



Bodleian Libraries

UNIVERSITY OF OXFORD

This book is part of the collection held by the Bodleian Libraries and scanned by Google, Inc. for the Google Books Library Project.

For more information see:

<http://www.bodleian.ox.ac.uk/dbooks>



This work is licensed under a Creative Commons Attribution-NonCommercial-ShareAlike 2.0 UK: England & Wales (CC BY-NC-SA 2.0) licence.

~~cc d 24~~



TAR 6755-

~~A/W 2998 A.2~~



JEAN-ANTOINE DE BAÏF

LES MIMES

ENSEIGNEMENTS ET PROVERBES

★ ★



LES MIMES

ENSEIGNEMENTS ET PROVERBES

DE J.-A. DE BAÏF

RÉIMPRESSION COMPLÈTE COLLATIONNÉE

SUR LES ÉDITIONS ORIGINALES

AVEC PRÉFACE ET NOTES

Par PROSPER BLANCHEMAIN



PARIS

LÉON WILLEM, ÉDITEUR

2, RUE DES POITEVINS, 2

—
1880





BRVLARD, sous ton visage austere
Vn courage prompt à bien faire,
Eproué pour moy plusieurs fois,
Si tu te trouues d'auanture
Où mes censures on censure,
Me fait assurer de ta voix.
En lieu de se mettre en colere
Des fautes que nous voyons faire,
Vn Heraclit en eust ploré:
Démocrit s'en fust pris à rire.
Plore qui voudra : i'en veux dire:
En vn mot, Tout est déploré:
Vn chemin faut choisir et suiure.
Pour cela pourquoy tu veus viure
Tu ne dois fuir de mourir.
Si moins d'ennuy plus de plaisance
Font viure bien, la iouissance
Au bien eternal va querir.
Douce paix et repos aimable
Pres de temperance amiable
Viennent volontiers demourer.
Vn chacun la robe salue :
Pour la vertu nul se remue.
Beau semblant se fait adorer.

Le monde sot est vne beste
Qui n'a ceruelle dans sa teste,
Et va bridé comme vn cheual.
Gardez de luy oster la bride :
Laissons-le ainsi. Qui trop bon cuide
Le debrider, s'en trouue mal.
l'en ay fait la preuue certéne,
Il se donne beaucoup de péne
Qui veut le monde endoctriner.
Tromper les hommes est facile,
Et ne faut estre guiere abile,
Puis qu'ils n'aiment qu'à badiner.
Ceux mesmes qui cherchent d'aprendre,
Enuis suiets se viennent rendre
A peu qui sçauent ce qui faut.
Mais de gré piper ils se lessent
A beaucoup qui iamais ne cessent
D'agueter le peuple badaut.
En grand nombre ces pipeurs brauent,
Qui rien de bon ni beau ne sçauent
Ni ne voudroyent plus en sçauoir.
Car ils ont tous l'experience
Sans autre penible science,
Comme c'est qu'il faut deceuoir.
Mais nostre mal, le mal extrême !
Est que chacun de nous luy mesme
Est de soy mesme le trompeur.
Chacun en soy mesme se fie,
Chacun se croit. Nul s'en défie,
Nul n'a de soy doute ni peur.
L'autre cause de la misere,
Le vray, c'est vne chose amere

Et déplaisante aux ignorans.
D'ailleurs la mensonge amiable
Leur est douce et bien agreable.
C'est pour quoy nous allons errans.
Comme la clairté gracieuse
Offense et deplaist ennuieuse
A ceux qui sentent mal aux yeux :
Au rebours, l'obscurité sombre
Et des tenebres la noire ombre,
Sans douleur ils endurent mieux.
Ainsi de la verité bonne,
La grand' lumiere qui rayonne,
Fasche les malades esprits :
Et la mensonge flateresse
D'vn voile gracieux les presse
A iuger le vray mal apris.
Mais s'il est malaisé d'aprendre,
La grand' peine est au desaprendre,
Mesmement si par vn long tems
Ils n'ont ouy que menteries
Et faussetez et tromperies,
Dés qu'ils tetoyent s'en alaitans.
Non seulement eux : mais leurs peres
Et peres grands, avec leurs meres
Et meres grands et bizayeuls,
De memoire immemorale
Sont abreuuez d'vne godale,
Qui leur oste le goust de mieux.
Pour tant c'est chose malaisée
Leur opinion épousee
Deraciner de leur cerueau :
Quoyque raison leur soit contraire,

Quelque argument qu'on sache faire,
Rien que l'abus ne leur est beau.
Ils feront comme vn qui s'adonne
A l'enfant qu'une mere donne
Chez la nourrisse le changeant,
Qu'il fait nourrir et qu'il auoue,
Qu'il dorlote et qu'il amadoue
Comme son naturel enfant.
Mais s'il auenoit qu'on luy die
La verité, sa fantasie
De l'enfant ne peut diuertir :
Laquelle iamais n'y eust mise,
Si parauant telle surprise
On fust venu l'en aduertir.
Ainsi nous aimons idolatres
Durs et fermes opiniatres,
Nos vieilles persuasions :
Et le faux qu'on nous fait acroire
Jeunes, vieux ne voulons décroire
Pour les vraies opinions.
Puissé-ie moy chanter et dire
Et dans mille papiers écrire
Enseignements sages et sains,
Sans que ie brouille ny remue
En la cité chose qui mue
Des saintes loix les bons desseins.
Pour la santé du corps, nous homme ;
Soigneux et diligens nous sommes :
Aux medecins auons recours :
Mais nul pour la santé de l'ame
A fin de la sauuer de blâme,
Ne cherche les benins secours.

C'est que du corps la maladie
Prenant la personne alourdie
Se iuge par l'entandement :
Mais lors que l'esprit est malade,
Le corps nonchalant et maussade
Ne peut le sentir nullement.
Ainsi faut que l'esprit luy mesme
Soit en sa maladie extrême
Seul iuge de son propre mal :
Et le pis est qu'en tel afaire
En ce dont il iuge, ô misere !
Le plus souuent l'esprit est mal.
O si Dieu nous auoit fait naistre
Tels que sceussions voir et cognoistre
La bonne nature en son point :
Et que la prinssions pour conduite :
Qui nous guidast en la poursuite
De nostre vie bien apoint !
Nous n'aurions que faire d'apprendre
Autre doctrine pour nous rendre
Plus clairuoyans de la raison.
Las ! nous n'auons qu'une etincelle
De l'integrité naturelle
Que nous troublons par méprison :
Quand par opinions peruerses
Et males coustumes diuerses
Nous en eteignons la clairté.
Car si des vertus la semence
Nee en nous prenoit accroissance,
Nous viurions en bien-heureté.
Mais si tost que venons au monde,
Où tant de mal et vice abonde,

Nostre nature on peruertist.
De mille abus on nous empesche :
Rien que mensonge on ne nous presche,
Qui nostre bon sens diuertist.
Superstition nous ameine
Des frayeurs l'ombrageuse peine.
Fausse volupté nous seduit.
Ambition vain-glorieuse
Enflant nostre ame vitieuse
Aux fausses vertus nous conduit.
Le peuple, nostre plus grand maistre,
Dedans ses erreurs nous empestre,
Par vn commun consentement
De la grand' foule du vulgaire,
Qui encline au mal ordinaire.
C'est où perdons l'entendement.
Car ou la gloire ou l'auarice,
Ou quelque autre amiable vice
La bonne nature corromt.
Ainsi beaucoup de personnages
Aueuglans leurs nobles courages
Se sont perdus et se perdront.
Or la terre qu'on ne cultiue
Porte (pour ne languir oisiue)
Epines ronces et chardons.
Mais il n'est ame si sauuage
S'elle preste l'oreille au sage,
Qui ne s'amende en ses façons.
La diuine philosophie
Est celle qui regist la vie,
Medecine de nos esprits.
Il guerira sans nulle doute

Qui veut guerir et qui l'écoute,
Pouuant souffrir d'estre repris.
En tout y a poix et mesure.
Les bornes sont de la droiture
Qui n'est ni deça ni delà.
C'est beaucoup la vertu cognoistre :
C'est bien plus de se faire adestre
A l'exécuter quand on l'ha.
Cherchons bien sçauoir et bien faire.
Ce qui est bien en tout afaire
Se regle à la droite raison.
La droite raison est l'entente
De la grand' nature constante,
En lieu moyen fins et saison.





LE sage doit sage paroistre
Haut et bas. Grand le grand doit estre
Et fust-il au fond d'un cauein.
BELLIEVRE qu'honneur acompagne,
Le nain fust-il sus la montagne
Ne sera pas autre que nain.
O si i'auoy de la richesse
Autant que la iuste sagesse
En souhette pour son besoing,
Je ne fuiroy la compagnie
Des plus grands, où ie hai ma vie
Honteux m'en retirant bien loing.
Au milieu d'eux haute la face
Je diroy d'une franche audace
Ce qui me poise sus le cueur :
Mais combien que le vray i'entande,
Paureté dure me commande
Cacher ce que i'ay de meilleur.
Muet ie suis: et n'ose dire
Que nostre infortuné nauire
Court par les vagues emporté.
Déia la voile est abatue.
Nul matelot ne s'éuertue.
L'eau perd l'un et l'autre costé.

Ah! que c'est chose malaisée
La mer par la pompe épuisée
En la grande mer reuerser.
Aucuns dorment : autres se cachent :
Nuls ne comparoissent, qui sçachent
Le peril pressant repousser.
Les bons mariniers qui bien sceussent
Y remedier s'ils y fussent,
Sont iettez dehors du vaisseau.
Eux pillent tout comme Corsaires.
Outrage conduit les affaires.
Tout flote à la merci de l'eau.
L'ordre est perdu. Plus le partage
Egalement ne s'y menage.
Rien en commun n'est manié.
Faquins commandent : Et les pires
Au dessus des bons font les sires.
Ie crein fort que tout soit noyé.
Ie crein que la mer en furie
N'engloutisse la nef perie,
Tant ie voy tout desesperé.
Les bons ce nauigage éuentent :
Les mechans, s'ils ont du sens, sentent
Mon enigme trop auéré.
Mes amis, la France est enceinte :
Ce que i'en diray n'est pas feinte :
Veut enfanter. Et ie crein fort
En son trauail qu'elle n'enfante
Vn qui nostre fierté méchante
Chastira, demouré plus fort.
Car encor le commun des hommes,
Nous tels quels citoyens nous sommes

Qui le mors des loys reprendrions.
Mais les grands nourris à mal fére
Sont prests de choir en grand' misère :
Et faudra que nous les suiuiions.
Les bons, tant qu'ils y dominèrent,
Iamais nul estat ruinerent.
Mais quand les mauuais dominans,
Faisant ieu de cruel outrage,
Nourrissent des peuples la rage,
Tout bon ordre ils vont ruinans.
Lors que pour leur grandeur priuee,
Chauds d'ambition reprouuee,
Aux méchans font des passedroits,
Partiauls, pleins de nonchalance
Au bien public, de violence
En leurs particuliers endroits :
Tien pour chose toute asseuree,
Qu'il n'aura pas longue duree
L'estat où ces mauls regneront.
Encores qu'y veisses paroistre,
Quelque repos : tout va décroistre,
A mesure qu'ils gagneront.
Car depuis qu'au public damage
Les grands trouuent leur auantage,
Pour nourrir leur ambition
Et leur detestable auarice,
Là germera tout vilain vice,
Le meurtre et la sedition.
Nostre France est tousiours la France :
Mais des hommes la mesme engeance
Change de façon et de meurs.
Vn tems le peuple y fut sauuage :


Depuis par vn plus doux vsage,
François polis se font meilleurs.
Est-ce pas vne chose estrange
Par vn soudain et nouveau change
Que les mauuais deuiennent bons :
Et puis par vn siecle execrable
Des bons la race abominable
Suiure les peruerses façons ?
Qui ne s'en metroit en colére
Les voyant se rire et se plére
Quand s'entrepeuent deceuoir ?
Sans faire aucune diference
De bien ny mal (c'en est l'vsance)
Pourueu qu'ils en puissent auoir ?
Qui souffriroit sans en mot dire
De voir autorisé le pire,
Le meillieur desautorisé ?
A nul d'eux du tout ne te fie :
Ce n'est que tort et tromperie.
Qui sa foy garde est meprisé.
Ne leur sois en nul bon afaire
Ami de cueur : mais pour bien faire
Ami de bouche te feindras.
De chose qui soit d'importance
A nul qui soit avec fiance
Te declarer tu ne voudras.
Car éprouuant bien la pensee
De la male gent insensee,
Au fait ne verras nulle foy.
C'est que deprauez ils se plaisent
Quand traitres ils s'entremalaisent
Sans respect de Dieu ni de Roy.

Partant quelque serment qu'ils facent
Garde toy qu'ils ne t'embarassent
En leur filet te surprenant.
Car on a perdu toute honte :
De l'honneur ne se fait plus conte :
Tout blâme regne maintenant.
Impudence a chassé Iustice.
Vertu fait ioug dessous le vice :
Temperance nous ha quitez.
Foy la Deesse venerable,
Charité douce et secourable,
Auec les bonnes Deités,
Vers le Ciel ont pris leur volee,
Laissans la terre desolee
En proye à l'outrage plus fort.
Esperance Deesse bonne
Seule nous demeure et nous donne
Quelque amiable reconfort.
C'est, ou que la guerre cruelle
D'vne vengeance mutuelle
Ce malin siecle abolira,
Ou que par le destin celeste
Vn homme de Dieu cette peste
D'vn saint remede guerira.
Car ce n'est en vain que s'apreste
La grand' assemblee qui s'arreste
En l'astre du Mouton doré.
Quand les planettes s'y conioignent
De toutes choses ils témoignent
Vn ordre nouveau restoré.
O qui sera ce braue Prince
Qui Roy de plus d'vne prouince

Les peuples vnis reglera,
Chassant des humains toute iniure?
Tenant main forte à la droiture,
Qui les méchans debellera?
Qui premier par vn clair exemple
Ouurant à Dieu sôn digne temple,
Voura l'honneur saint qui est deu?
Abolissant et l'heresie
Et l'idolatre hypocrisie,
Qui le vray deuoir a perdu?
Qui par l'aduis des hommes sages
Acomplissant les bons presages,
Ordonera les saintes loix,
Fondant vne ferme police?
Qui refreindra toute malice
En tous les estats à la fois?
Si bien que les mortels qui viuent
Les bonnes meurs tiennent et suiuent
En la creinte d'vn Dieu commun?
Si bien qu'vne concorde stable
Nourrisse la paix veritable
Pour tenir les peuples en vn?
Sur tout l'auarice il exile,
Car d'elle seule file à file
Prouiennent tout les autres mauls.
Ce monstre qu'on doit bien maudire,
Haue, hideux, l'homme fait pire
Que n'est pas vn des animaux.
Où va se ruer la peruerse,
Villes et champs elle renuerse,
Chasteaux et temples et maisons.
L'humain et diuin elle brouille :

Les plus heureux elle depouille
Par ses fortes enragezons.
Fossé ni rempart ni muraille,
N'empesche que sa force n'aille
Au plus auant de la cité.
Aux meilleurs elle oste la vie,
Parentelle, enfans, et patrie,
L'honneur et la pudicité.
Mais l'homme, que Dieu nous enuoye,
Ouure de la vertu la voye
Sauue le droit du tort deffait :
Et Roy, maintienne la concorde,
Viue Loy rompe la discorde,
Par bons propos suiuis, d'effet.





EN bon gueret bonne semence
Raporte fruit en abondance,
O MOLLAN amy de vertu.
En lieu de la semence vraie
Mauvais terroer nous rend l'yuraie.
L'ay semé cueillir puisses-tu.
Sous le Soleil rien n'a duree :
Nulle chose n'est assuree :
Tout se change : tout s'entresuit.
Faut mourir qui ha pris naissance,
Celuy finira qui commence.
L'vn acheué, l'autre on poursuit.
L'vn montre ce que l'autre cache :
L'vn l'a planté, l'autre l'arrache :
Ce qu'auons de grand soing dressé,
Nous renuersons par vn caprice.
Nous leuons vn neuf edifice,
Abatons le vieil delaissé.
Maintenant nous serrons à peine,
Ce qu'vn iour la dépençe veine
En le perdant nous vient oster.
S'il faut plorer faut soudain rire :
Qui de dueil les cheueux se tire,
De ioye apres ira sauter.

Nous cousons pour en fin découdre.
La terre est fange, soudain poudre.
Tantost muets nous nous taisons,
Tantost causons à bouche ouuerte.
Nous gagnons et nous faisons perte,
Nous nous aisons et malaisons.

Aucunefois d'amour extrême
Nous aimons, et la chose mesme
Que nous aimons, alons haïr.
Nous guerroyons à toute outrance :
Nous nous ioignons par alliance
Ceux que nous alions enuahir.

La guerre estoit, la paix est faite.
Que l'homme ait tout tant qu'il souhaite :
Comment se peut il contenter
Entre choses tant variables
Contraires, pareilles, muables,
Faites pour l'homme tourmenter?

Toute chose que Dieu a faite
Comme il est parfait, est parfaite,
Est bonne et belle en temps et lieu :
Mais l'homme à qui Dieu la propose,
Ne sçait trouuer d'aucune chose
La raison vraye selon Dieu.

Tout le bien que l'homme en peut traire,
C'est tant qu'il vit de s'en bien faire,
Et de s'en donner du plaisir.
Dieu fait à l'homme grande grace,
Si tant de trausers il passe
Paissant de ses biens son desir.

Certainement ie vien cognoistre
Que tout cela que Dieu fait naistre

Est tel comme il luy plaist qu'il soit.
Qui pense pour bien s'en debatre
Y adiouster ou en rabatre,
Il n'y peut rien, et s'y deçoit.
Dieu seul tout parfait et tout sage
Nous mét à mesme son ouurage,
A fin que voyans ce qu'il fait
En diuersité si estrange
Dedans le brouillis de tel change
Reuerions l'ouurier si parfait.
Nul ne preuoit son auanture :
Et s'il la preuoit d'auenture
Que lui profite la preuoir?
Nul n'est si puissant qu'il éuite
Le sort où lon se precipite.
Rien ne vaut preuoir sans prouuoir.
Ce qui plus l'esprit me trauaille,
C'est lors que ie pense qu'il faille
Que les bons souffrent tous les maux
Deuz aux méchans : et qu'au contraire
Les biens deuz aux bons pour bien faire
Se donnent aux plus deloyaux.
Le méchant qui n'a point de cesse
De mal faire, croist en richesse :
Tout luy succede à son souhait.
Le bon de bien faire prent peine :
Et semble que sa peine est vaine,
Dautant que fortune le hait.
Du méchant ie sçay, quoy qu'il semble
Que tout bon heur chez luy s'assemble,
Que ce bien n'est pas le vray bien.
Mesme les beaux iours de sa vie,

Ausquels le peuple porte enuie,
En l'éternité ne sont rien.
Ce n'est qu'une ombre qui tost passe.
Pour les biens la mort ne fait grace :
Bons et mauvais passent le pas.
Si sçay-ie que l'heur veritable
Attend celuy qui droit et stable
Reuere Dieu iusqu'au trespas.
C'est malheur de quoy la prudence
Ne regist nostre humaine engeance,
A qui le vaut donnant le pris!
Mais qui sçait courir, on l'amuse.
Qui sçait conseiller, nul n'en vsc.
Le poltron pour vaillant est pris.
Le sçauant sa misere queste,
Le vertueux se rompt la teste,
N'a dequoy viure, et meurt de faim.
Du bon maistre on ne fait estime.
L'ignorant tenu pour le prime
Braue parmi le monde vain.
L'homme ne sçait non plus son heure
Que le poisson, qui plus s'asseure
Quand il s'amord à l'ameçon :
Ou que l'oyseau qui plus se hette
D'aise et plaisir, quand il se iette
Dans les filets à l'etelon.
Mais iay cognu que sus la terre
Sus les humains en paix et guerre
La sagesse auoit vn grand poix.
Vne ville fut bien petite :
Dans elle peu de peuple abite :
Vn grand Roy l'assiege vne fois.

Fait des forts tout alentour d'elle.
Sus tranchee fait tranchee nouvelle.
Se promet l'emporter d'assaut.
Vn pauvre homme estoit dans la ville
Pauvre d'auoir : mais tres abile,
Combien que l'auoir luy defaut.
Ce pauvre par sa grand' sagesse
Tira sa ville de l'opresse
Que le tyran luy aprestoit.
Par auant nul n'en faisoit conte.
Par apres trop ingrante honte
En pareil mépris il estoit.
Quand tous les faits ie considere
Des deux sexes : quand ie confere
Tout ce qui me plaist et déplaist
En nostre race miserable,
De mille hommes vn tolerable,
De mille femmes nulle l'est.
A l'homme qui vraiment est sage
Sagesse adoucist le visage,
Le rend aimable et gracieux.
Oste la cruelle rencontre
Toute douceur courtoise montre,
Qui rompt les plus audacieux.
I'ay veu doubles vilains de race,
Cheualiers panader d'audace :
I'ay veu les nobles auilis,
Abaissez d'estat et courage,
Estafiers, en pietre équipage,
Suiure les vilains anoblis.
Qui fait la trape, qu'il n'y cheie :
Qui fourgonne dans vne heie,

L'aspic pourra mordre sa main.
Il se lasse qui pierres rue.
Qui busche long tems d'ahan sue.
Fer rebouché recongne en vain.
Serpent qui vient mordre sans bruire,
Est vn detracteur qui va nuire.
Le sage parlant parle court :
Mais en vn mot plus il profite
Qu'vn fol ne fait, qui moins merite
Quand plus longuement il discourt.
Bien malheureuse est la patrie,
Qui par vn enfant est regie,
Où les Princes mangent matin !
Que la patrie est bienheureuse
Où la personne valeureuse
Regne par vn meilleur destin !
Bien est celle nef deplorable
Auecques la gent miserable,
Là où de la tourmente au fort,
Lors que les vents qui la mer ouurent
Les abismes des eaux découurent,
Le Pilote au peril s'endort.
D'vn maistre sot le peu de cure
Laisse gaster la couverture,
Qui tellement s'entrouurira
Par faute d'estre racoutree,
Que la pluie y trouuant entree
Planchez et parois pourrira.
Qu'on se garde bien d'en rien dire,
Non pas quand seul on se retire
Dans son cabinet à huys clos.
Trop deuisant les fous s'afolent :

Mesmes les oisillons qui volent
En reueleroient le propos.
Qui trop regarde quel vent vente
Jamais ne seme ni ne plante.
Qui creint la pluye, fait maigre oust.
Qui ne pétrist, bon pain ne mange :
Ia ne fera grasse vendange.
Qui hait la peine et fuist le coust.
Faut reuerer Dieu, faut le creindre.
L'esprit humain ne peut atendre
Au secret du conseil diuin,
Qui construit ordonne et dispose,
Fait et conserue toute chose
En sa propre et certaine fin.





LE ROY, il est Roy qui est sage.
Le sage regne en son courage :
Qui bien y regne, est digne Roy.
Il est Roy qui bien se commande :
Autre empire ie ne demande
Que de bien commander chez moy.
Le sage dit : Puis que ton âme
Est diuine, c'est vn grand blâme
De n'en faire cas autrement.
Toutes ordures dechassees
Ornon-la de pures pensees
Et d'vn entier entandement.
Le sage dit : Nul mot n'auance
De Dieu qu'en toute reuerance,
En toute saison en tout lieu,
Soit que l'heur à souhet te rie,
Soit que l'heur en malheur varie.
Croy tousiours et di : Dieu est Dieu.
Le sage dit : Vaille que vaille,
Du gouuernement ne te chaille.
Tel qu'il est le faut embrasser.
Toy fai bien : Ne trouble ta vie
Du tems ni de la seigneurie :
Les plus chargez laisse passer

Arte par tout : Le mal qui fasche
En toi-mesme tant sois-tu lasche,
Tu vois, tu cognois, qui le sens :
Mais le bien tu ne peux cognoistre.
Peu de bien sans mal on voit estre.
Au chois du bien faut vn bon sens.

Tien pour vray que la defiance
En tout afaire d'importance
Peut garantir de grand danger :
Croire trop et par trop mecroire
Ont fait perdre mainte victoire.
Croy donc : mais ne croy de leger.

Le sage dit : Qui sçait bien creindre
Sçait ateindre où il faut ateindre.
Sçais-tu que c'est qui est sans peur ?
C'est vne conscience nette.
Pour la vertu la plus parfette,
Redoute en heur, ose en malheur.

Le sage dit : Vise et regarde
De quoy faut que te donnes garde.
Et l'apren dans le mal d'autruy.
Par la faute d'autruy le sage
Fuit de sa faute le dommage :
Le fol ne le sent que sur luy.

Tien pour vray que nulle personne
Ne rencontre vne heure si bonne
Qui ne soit mauuaise à quelcun :
Nulle saison n'est si mauuaise
Qui à la parfin ne s'apaise.
Atten, tu n'auras mal aucun.

Le sage dit : En tout afaire
Ce que tu peux aujourd'hui faire

Ne difere pas à demain :
Pour vne douteuse espereë
La chose que tiens assuree
Ne laisse échaper de ta main.
Le sage dit : En ce bas monde
Le mal dessus le bien abonde,
Et le pis surmonte le mieux.
Des sots la badine creance
Fait des abiles abondance :
Les ignorans forgent nos Dieux.
Tien pour vray, Que lors que le vice
Et la débauche et la malice
Tu vois en public prosperer,
A bonté vertu modestie,
Toute misere departie :
De l'estat il faut despeser.
Baïf te dit apres vn sage :
Sans mal ne se peut vn ménage
Tenir dedans vne maison.
C'est mal d'epouser vne femme :
Femme non épouse diffame :
Au hazard où faut la raison.
Fui l'amour. Car de sa nature
Amour est sourd, qui n'oit n'endure
Ni reçoit amonnestement.
Amour est vne maladie
Qui va son cours : quoy qu'on luy die
L'amoureux aime son tourment.
Le sage dit : Fui la presance
D'vn maistre courroucé qui tance,
Ou bien ne lui replique rien.
De celui que tu verras estre

En courroux, tu te fais le maistre,
Luy calant à propos et bien.
Ton Roy tel comme il est, supporte :
Qui en regnant mal se comporte
Détruit assez la royauté.
Toute faute d'un qui commande
Perd le subiet qui se debande.
Trop de pardon est cruauté.
Le sage dit : C'est grand' science
Sauoir supporter l'ignorance :
C'est vne grande abileté
Quand point on ne se formalise
De voir d'un autre la sotise,
Et se tenir en sauueté.
Souuent de trop leger langage
Lon voit reuenir grand dommage
Enuers les hommes et les Dieus.
Celuy qui sçait à point se tere,
Outre que point il ne s'altère,
Demeure sans blasme en tous lieux.
Mensonge fait courte plaisance
Au commencement qu'on l'auance :
Honte et perte suit le mentir.
Le mentir si bien se decrie,
Que quand il dit vrai nul s'y fie.
A se taire nul repentir.
Le sage dit : Verité dite
Mal à propos nous precipite.
Verité n'est bonne qu'aux bons.
Trop de méchans viuent au monde :
Qui trop sur verité se fonde
lette ses perles aux cochons.

Le sage dit : Qui peut l'apprendre
Mieux vaut en nous mesmes reprendre
Nos fautes que celles d'autrui.
Comme l'absinte a l'amertume.
Aussi vrai dire a de coutume
D'auoir de l'amer quant et luy.
Le bois qui fera le feu croistre,
Mangé du feu va disparoistre
Défait par celuy qu'il nourrist :
Richesses les flatteurs nourrissent
Qui les richesses amoindrissent.
Qui s'aime trop, il se pourrist.
Hors de saison faire despence
En soufrete change abondance
Autant aus grands comme aus petits.
Chiche taquin et vilain estre
Fait que lon hait des biens le maistre.
Mesure en tous nos appetits.
LE ROY mon ami ie te iure
Que des biens ie n'eu iamais cure,
Et ie n'y mis iamais mon cueur.
N'auoir biens tant d'ennuis n'apporte,
Comme quand il faut qu'on en sorte,
Les perdant par quelque malheur.
Cela que paix le monde appelle
N'est qu'un nom d'une chose belle
Qu'il faut chercher dedans les cieux.
Iamais ne fut que sur la terre
Hommes ne s'entrefissent guerre
Ou veincus ou victorieux.
Le droit fatal ainsi l'ordonne,
Et la loy de nature donne

Les biens du veincu au veincueur.
L'vn auioird'huy le bien possede,
Que demain à vn autre il cede.
Nous veinquerons : ayons bon cueur.
Ce n'est le nombre ni la force
Qui les grans batailles renforce
Pour aux victoires paruenir.
C'est le bon droit et le courage
Dieu aidant qui fait l'auantage,
Où l'ennemi ne peut tenir.
Vne fois nous auons à estre :
Deux fois il n'est permis de naistre :
D'estre, vne fois nous cesserons.
Du lendemain nul ne s'asseure :
Pourquoy donc perdons nous vne heure
Du present que nous lesserons ?
A fin qu'vn bien plus long tems dure
Taschons l'aquerir sans iniure,
Gardon-le sans peine et tourment :
Le bien aquis sans violence
Sans regret et sans repentance
Soit depensé ioyeusement.
De nul forfait ne soions blesmes.
Faisons bien, premier à nous mesmes :
Puis aux prochains : puis aux amis :
A ceux dont la valeur merite.
Nous dirons s'il faut qu'on le quite,
Moins a perdu qui plus a mis.
Assez de gens sont en ce monde,
En qui bien peu de sens abonde,
Qui le present ne viuans pas,
Comme ayans autre vie à viure,

Mettent grand' peine de poursuiure
Des biens non iouis au trepas.
Quand à moy ie tien que la vie
En biens et plaisirs non iouie
Prenant toutes choses au pis,
C'est vn long et facheux voyage,
Où lon dépend en vain son age,
Sans se rafraichir au logis.
Ainsi toute chose prospere
Chez toy, comme par toy i'espere
Secours en mon oisiueté :
Aus autres maus ie me conforte:
Mais ie n'ay pas l'ame assez forte
Au mépris de la pauureté.





Houpegay Hovp : l'an recommance
Et ma fortune autant s'auance
Comme elle s'auançoit antan.
Autant comme vn an vaut vne heure.
Qui peut rire il est fol qui pleure.
As-tu nom Pierre? i'ay nom Ian.
Entre les badins ie badine,
Entre les deuins ie deuine:
A chacun ie riue son clou.
Ie remê vieus mots en vsage.
Les sages me tiennent pour sage :
Entre fouls ie passe pour fou.
Abandonné de parentelle,
Priué d'amitié fraternelle,
En ma plus grande auersité,
Estrangers me font courtoisie :
Par ne sçai quelle frenésie
Mes plus grands amis m'ont quité.
Tant seulement i'ay mon bon ange
Qui iamais de moy ne s'étrange
Me consolant en mes douleurs :
Qui me fait plorer mes liesses,
Et me rire de mes tristesses,
Et me moquer de mes maleurs.

O mon bon ange, ie te prie
Ne me permettre que ie die
Ni bien ni mal qu'avec raison.
Ie me garderai de l'iniure
Qu'à decouuert on me procure,
Toy garde moy de la traison.
Nulle amitié n'est immuable :
Nulle inimitié perdurable.
Haï comme pouuant aimer :
Et comme pouuant haïr aime.
Qui bien ou mal fait, fai de mesme :
Dedans la mer ne va semer.
L'homme indiscret en vain trauaille.
Qui va sans conseil, où qu'il aille,
Courût-il, n'auance de rien.
Mauconseil ruine les hommes :
Par bon conseil hommes nous sommes.
Nul ne vit comme il voudroit bien.
Houp, si tu veus bien heurus estre,
Pour bien l'estre, il se faut cognoistre.
Estime tien ce qui est tien :
Ce qui n'est tien pour tien n'estime.
Soigne le tien et le relime :
De l'autrui ne te peine en rien.
Il est mien à tout bien pretendre,
Le rechercher, le faire entendre,
Le declarer à qui le veut.
Il est en autrui de bien faire
Selon mon auis salutaire,
Ou qui le veut ou qui le peut.
Ie di, i'escrï ce que i'en pense :
Ce n'est ni par outrecuidance

Ni par mauuaise volonté.
Ie ne pren plaisir à médire :
L'orgueil ignorant ne m'empire :
Ie sui ma naïue bonté.
A grans et petits ie m'adresse :
Nul ie n'offense ni ne blesse :
l'apporte conseil et secours,
Qu'à tous ie propose et presente :
Et veu bien que chacun s'en sente,
Mais peu goutent bien mes discours.
S'aucun ha quelque maladie
En sa personne, il s'étudie
Tant qu'il peut à se bien panser.
Vn bon medecin il appelle :
Prend son conseil, et d'vn bon zele
Croit et fait tout pour auancer
La santé du corps. Mais de l'ame
Nul nul medecin ne reclame.
Et le plus malade est celui
Qui s'estimera plus sain estre.
C'est faute de bien se cognoistre :
Ame n'est qui n'ait son ohi.
Chacun se croit le plus abile
Chacun ha le cerueau debile :
Chacun se rit de son voisin :
Chacun en autrui voit la faulte :
Voir la sienne c'est chose haulte.
A vrai dire on n'est pas cousin.
Ce n'est pas moy, mais c'est mon liure
Si tu veux qui t'apprend à viure.
Mon liure est plus sauant que moy.
Bien souuent mon liure m'enseigne :

Et son conseil ie ne dedaigne
Qui m'a souuent tiré d'emoy.
Souuent aussi ne puis le croire :
Car ie n'ay pas de tout memoire
A tout propos à mon besoin.
Et pour la vertu bien aprendre
Son vice faut souuent reprendre,
Qui ne s'aquiert sans vn grand soin.
Tant nostre vice nous demange !
Il cuit d'vne façon estrange
Si on le touche tant soit peu.
Chacun se plaist quand on le flate :
Nul ne veut que son vice on grate,
Ou soit à bon ou soit à ieu.
De ceux qui sont pres ie m'absente,
Aux eloignez ie me presente.
Mais commander c'est vn deuoir
Non pas vne royauté vaine :
Petits se contentent à peine :
L'assez des grands, c'est trop auoir.
Quand l'homme commence estre sage
Lors il acheue son voyage.
Nos outrages nous font hair :
Nos miseres nous recommandent.
Les sages par les fous s'amendent.
Raison ne peut se faire ouir.
Ne point sentir n'est pas fait d'homme :
Mais ne pouuoir porter la somme,
N'est le fait d'vn homme de cueur.
Nul ne doit fuir de la vie :
Mais sans en auoir trop d'enuie
Tachons d'en sortir par douceur.

Nous en sommes : il faut poursuiure.
Entre les viuans il faut viure :
Viurons-y comme nous pourrons.
Ne pouuant ce que voudrions faire,
Voulons le pouuoir ordinaire.
Tousiours viuans ne demourrons.
Ceux-la qui t'aimoient te haïssent,
Tes plus familiers te trahissent,
A qui tu fais bien, te font mal.
C'est leur faulte ce n'est la tienne :
Si c'est la tienne, t'en souuienne.
Croy le mors que croit vn cheual.
Si l'honneur ne te peut atraire,
Te puisse la honte retraire :
Si le bien tu ne veux choisir,
Le mal te cuisant t'en retire.
Si le vray plaisir ne t'atire,
Abhorre et fuy le deplaisir.
A qui sans y penser t'offence,
Ne cherche point d'autre vengeance.
La vraye iniure part du cueur.
Qui te fait du bien par contrainte
En son bien fait n'a point d'étreinte.
Le miel est fiel à contrecueur.
A qui veut, la peine peu couste.
Qui a son vueil, il s'en degouste.
Espoir deceu poise beaucoup.
Le bon heur le malheur mesure.
Audace tout mal se procure.
Peur ne frapa iamais grand coup.
Ce qui peut se perdre n'est nostre.
Nous voions trop clair en vn autre :

O qu'en nous nous vissions autant !
Force nous faille et non courage.
D'heure choisissons l'avantage.
Force forcée conseil n'atand.
Plus vault le fait que la parole.
Parler sans faire est chose fole :
Se taire où fault parler, est pis.
Beaucoup font vertu de vantise.
Aux vices l'amour est tost mise :
La vertu fait bien peu d'amis.
Le tems les plus fous medecine.
La raison les sages domine,
Et fait ce que le tems fera.
A peine est on heureux et sage :
Où la misere a l'avantage,
La prudence à peine y sera.
Qui aide celuy qui offense,
Offense : et qui le mal auance
Par autruy, fait luy mesme mal.
Iusqu'à l'autel ami faut estre.
Veus-tu bien vn mechant cognoistre ?
Tout fait pour soy le deloial.
Au monde il n'y a rien de pire
Que celuy qui tout à soy tire,
Et qui ne fait rien que pour soy.
C'est ce qui decoust l'aliance
Des citoyens et l'assurance.
O Dieu combien i'en aperçoy !
Homme repense à par toy comme
Et pourquoy c'est que tu es homme.
L'homme s'il veut à l'homme est Dieu
Quand à l'homme il est secourable.

Et l'homme à l'homme dommageable
D'un loup sauvage tient le lieu.
Allez maudites bestes brutes.
Où tirez-vous ? où son vos buttes ?
Où est le blanc que vous mirez ?
La peste et le gast de nostre age,
Toute folie et toute rage,
A rien que mal vous ne tirez
Le grand loier se donne aux vices :
Les grandes vertus sont malices :
De bonnes meurs il n'en est plus.
Larcins, pillages, fetardises,
Toutes infames paillardises,
Sont les chapeaux des mieux voulus. .





PINARD, les escrits ordinaires
Des secrets ou communs affaires,
Auecques vos sins se mourront :
Mais les noms escrits en mon liure,
Qui doit bien plus d'un siècle viure,
Auecques mes vers demourront.
Comme le sel en la viande,
Le rire par moyen demande
En nos deuis estre vsité.
Le sucre est bon à la moutarde.
En nous riant qu'est-ce qui garde
Que ne disions la verité ?
Propos de beaucoup de langage
Ne sortent pas d'une ame sage.
La langue accuse les esprits.
En la cité l'heur et la ioye
C'est peu valant grosse monnoye,
Peu d'ordonnances de grand pris.
La loy de l'univers est grande.
Naistre et mourir la loy commande.
L'homme auisé du tems se sert.
Fortune rend fol qui s'y fie.
Le changement recree la vie.
L'un y gangne, si l'autre y perd.

Bon renom vaut vn heritage.
Fortune est legiere et volage,
Tost reprend ce qu'elle a donné.
Fortune pipe s'elle flate,
Veut écorcher où elle grate :
Croy-la, tu es abandonné.
Tout mal guerist par patience.
A cueur dolent nulle creance :
Par grand' douleur ment l'innocent.
Mal double qui ne peut se pleindre.
Plaisir déplaist s'il faut le feindre.
Le mal qui fait bien on ne sent.
Qui quiert la mort la vie acuse.
Celuy volontiers mal en vse
Qui se promet viure tousiours.
Ce que l'homme vit Dieu le prête.
L'heureus meurt ains que mort souhete.
Mieux meurt qui mieux vit en ses iours.
Plus fault qui fait plus d'entreprises.
Peine et soing font les belles prises.
Hazard fait tout mieux à propos.
Occasion nous soyt propice.
Garde toy libre de tout vice :
Innocence est vn doux repos.
Tant que peus cache ta misere :
Toute terre auoue qui prospere.
Reçoy plaisir et plaisir fai.
Le plaisir receu te retiene :
Du plaisir fait ne te souuiene.
Aide à tous, à nul ne méfai.
Pour viure heureus n'aime grand'suite.
Contre le siecle en rien ne luite.

Rien à cueur, mais pren tout en ieu.
Oubli, retien, atten, endure.
La vie au malheureux trop dure.
Au bienheureux dure trop peu.
Il n'est point de plus griéue peine
Que d'estre en la publique heine.
Il n'est homme tant soit-il bas
Qui du plus grand homme en puissance
Ne puisse esperer la vengeance.
Heur en orgueil ne dure pas.
Si à bien faire on te surmonte
Prendre le dois à grande honte.
Qui donne malaisément,
Honteusement perd ce qu'il donne,
Perte c'est honte à la personne
Qui fait perte nonchalamment.
Autant se dechet de la grace
D'vn bienfait, que de tems se passe
Tardant la grace du bienfait.
Tard vouloir à non vouloir semble.
Bienfait sus bienfait il assemble
Qui tost l'accorde et tost le fait.
Ce que lon perd sans qu'on l'auise
Pour grand dommage ne se prise.
Ne sçauoir, c'est heur en maleur.
C'est du mal vn remede fade,
C'est quelque plaisir au malade
Ne point cognoistre sa douleur.
Ce que l'on cherche on ne rencontre:
Qu'on n'y pense plus, il se montre.
D'vn coing au ciel on peut voler.
La vraye ioye est chose austère.

Qui à propos ne se peut tere,
A propos ne sçaura parler.
C'est vn vice trop à reprendre,
Pour n'auoir appris rien n'apprendre.
De peu de grain, du fruit beaucoup.
L'autruy seul louer, est folie.
Par vn forfait l'autre s'oublie.
Qui rien ne creint fait vn beau coup.
Paureté seule nous terrasse :
Aporte creinte, oste l'audace :
Obscurcist la noble vertu.
Dedain estranglé la parole.
Depit aueugle l'ame fole.
Mépris le cueur foule abatu.
Qui plus ha plus auoir desire.
Car plus il ha plus il retire
Moyen d'auoir plus qu'il n'auoit.
Vertu n'ha, où elle a puissance,
Ni contrecueur ni repentance.
Dueil cesse tost que nul ne voit.
C'est don de Dieu que la sagesse.
Sage veut et n'aime richesse,
Veut, non l'auoir, mais en iouir.
La vie dure assez qui en vse.
Malheur vient à qui l'heur refuse,
Bien, à qui le mal sçait fuir.
L'heur est chose mal assuree.
Contre vértu rien n'ha duree.
La patrie est où l'on est bien.
Il est pauure qui le pense estre :
L'espoir vn autre espoir fait naistre.
Il n'est aimé, qui n'aime rien.

Forfait du forfait est la peine.
Mauvais au mauvais maleur meine.
Bon au bon secours va donnant.
Le malade santé n'espere,
A qui le medecin veut plére,
Au desordre l'abandonnant.
Autant de iours autant de vies.
Celuy que tu pleures et cries
Comme perdu, s'en va dauant.
L'age d'aucuns n'est du tout fête
Que la vie en sera complète.
Prou vit qui vit sage et sauant.
Qui fait bien et se taist, enseigne :
Qui dit bien et l'effet dedeigne,
A son dire oste le credit.
A mieux non à plus sauoir tire.
Qui plus qu'assez sauoir desire,
Se déborde en son apêtit.
Ne sçauoir ni pouuoir forfère
Du non vouloir beaucoup difère :
Vice ne peut seul se tenir.
La vertu (comme aussi le vice)
Par le sçauoir et l'exercice
Veut se nourrir et maintenir :
Tu seras bon si tu veus l'estre.
Que sert preuoir, que vaut cognoistre
Le mal que ne peus éuiter ?
F'uir ne pouuons la containte :
Souffrir nous en pouuons l'étrainte,
Et la victoire en meriter.
Celuy qui ha la bien naissance
D'esprit et corps pour la vaillance,

Disons-le noble-né vraiment.
En tous endroits on peut bien viure.
Qui la vertu seule veut suiure
Ne plaist au peuple entierement.
Plus il y ha de defiance,
Plus au chemin ha d'assurance.
Contreinte au faineant donne soing.
Perdre honte est vn mal extrême.
Bien malheureux est, qui soy même
Se peut reprocher pour témoing.
O que d'heur auroit nostre vie
Si nous nauions de rien enuie
Sinon des choses d'ici bas!
Trop cherchans perdons l'auantage.
Des humains l'humain le plus sage
A toute heure sage n'est pas.
Chacun son heur forge à sa mode :
Pas vn de tous ne s'acomode,
Faulte de borner son desir.
Quand l'vn finist l'autre commence :
Et cherchons en la iouissance
D'vn plaisir vn autre plaisir.
Il est Roy qui sçait rien ne creindre :
C'est bien, à ses souhets ateindre.
Tout de mesure et de saison.
Sur tout l'outrecuidance on prise
En ce tems on tient pour sotise
De se contenter de raison.
Qui les autres par armes donte
Souuent le vice le surmonte :
Qui fuit fureur, est maumené.
Qui ne songe que pour son age,

Se montre de peu de courage
Pour le bien de peu d'hommes né.
Sans mépris la soufréte on soufre.
Au vouloir rien de grand ne s'oufre,
Au pouuoir le petit est grand.
D'où la chose lon tient perdue
Espérance et peur se remue :
Qui enseigne vn autre, il s'aprand.
Tant que ne sçais te faut aprendre,
Ou tant que vis, pour ne méprendre,
Ne fuy iamais de trop sçauoir.
Maints hommes dauant qu'ils cognoissent
Que c'est de viure, viure cessent.
Auec sauoir, sens faut auo'r.





Ieune LANSAC, dés ton enfance,
Fuyant le chemin dignorance,
Apren de choisir la vertu :
De ton pere la preudomie,
La valeur de ton frere amie,
Sans estre piqué verras-tu ?
A toy qui as l'ame bien née,
De beaus patrons enuironnée,
Rien ne peut estre malaisé :
Mais en tout tes desirs tempere.
Douteux le trop sauoir modere,
Retenu pour n'estre abusé.
Eusses-tu pour voler des æles
Iusqu'aux demeures eternelles,
De Dieu ne cherche la grandeur.
Dieu tout sauant tout bon tout sage
Emplist le tout de son ouurage
D'incomprenable resplendeur.
Dieu desur tout honore et prise,
A fin que Dieu te seignorise.
Si Dieu se fait seigneur de toy,
Dessus toutes choses quelconques
Seigneur seras. Honore donques
Ton Dieu ton Seigneur et ton Roy.

L'honneur plus grand que puisses rendre
A Dieu, sera de bien aprendre
A le cognoistre et l'imiter,
Combien qu'il soit inimitable,
Et rien ne soit du tout semblable
A luy qu'on ne peut limiter.
Or celuy de plus pres l'imite
Qui plus toute indigence euite.
Qui? Qui à moins se passera.
Enuers Dieu soit grande ta vie,
Enuers les hommes fui l'enuie.
Tel est qui les bons aidera.
Mais tout le temps que ta pensee
Vers Dieu ne tiendras point haussee,
Tenir le dois comme perdu.
L'ame du deuôt qui contemple
Les faits de Dieu, c'en est le temple:
L'autel, le cueur à Dieu tendu.
Le nom de Dieu en vain ne queste.
Car ce ne t'est pas chose preste
En le questant d'y arriuer.
Quoy que soit qui quelque nom porte
Vn meilleur le nomme en la sorte,
Qui peut le nom de Dieu trouuer?
Dieu, n'est pas son nom veritable.
Mais c'est vn signe remarquable
Que nous recognoissons qu'il est.
Le nommer, c'est chose impossible:
Ne cherchon ce qui n'est loisible:
Adoron Dieu comme il luy plaist.
Sachon que Dieu n'ayant afaire
De rien qui soit, a voulu faire

L'homme, et Tout pour l'homme servir.
Dieu premier bienfeteur s'auoue.
L'homme apres parsonier s'aloue
De ses bienfaits pour en iouir.
Aux hommes Dieu (sans nulle doute)
Les aiant faits a donné toute
Pleniere et franche volonté :
A fin que semblables se fissent
A Dieu tout bon, et qu'ils véquissent
Nets de peché par sa bonté.
Quoy que soit que sur tout honores,
Comme Dieu cela tu adores :
Cela seul te seignorira.
Celuy de Dieu se fera digne,
Qui ne fait rien qui soit indigne
De Dieu en qui seul se fira.
Or entan donque pour bien faire
Tout ce qui est de bon afaire.
Davant Dieu ne se cache rien.
Dieu voit toute humaine pensee :
Pour ce en ton ame, au ciel haussee,
Ne pense rien qu'honneur et bien.
Quiconque chaste et saint se garde
De tout peché, rien ne l'engarde
Qu'il ne se face fils de Dieu.
Car Dieu l'a mis en sa puissance,
En luy rendant obeissance
Comme à son pere en chacun lieu.
Mésoing et diligence d'estre
Chaste et iuste, non de prestre.
Fui l'ordure : sui netteté.
Domte l'apétit deshonneste.

Volupté puanteur apreste.
Parle et fai toute honnesteté.
Nul ne peut faire à Dieu nuisance.
Du blasphemeur la medisance
Fait tout le pis que faire peut.
Ne fai ce qu'en l'autre tu blames.
Demande à Dieu quand le reclames,
Non ce que veux, mais ce qu'il veut.
Enuers Dieu la plus grande mechance
C'est de faire à l'homme nuisance.
Nul ne tien donc pour ennemi.
A toute noble creature
Que verras de mesme nature
Comme est la tienne, sois ami.
Mais aime Dieu plus que ton ame.
Au commun (qui sot loue et blâme)
De complaire n'etudiras.
Si tu fais bien, Dieu remercie
Comme autheur du bien de ta vie.
Autheur de mal? Dieu ne l'est pas.
Ne possede biens dauantage
Qu'ils sont besoin pour ton vsage :
Mais biens que nul ne peut t'oster.
Ce qu'il faut, comme il faut supporte :
Sois d'ame belle grande et forte.
L'ame apres Dieu doit s'exalter.
Non s'exalter de gloire telle
Qu'elle encoure mort eternelle,
Quand de trop s'aimer peché naist.
Mais à fin que digne se rende
D'estre de Dieu la maison grande,
Là où sa maiesté se plaist.

Où faut que la peine te meine :
Souhete ateiudre apres la peine :
Vœux de faineans sont vains propos,
Soit la raison par toy suyuie
Comme vraye loy de la vie.
Le sage apert en peu de mots.
Auant que dire delibere.
Car il vaut beaucoup mieux se tere
Que de parler sans profiter.
Parole qui n'a sens a honte.
Langage qui raison surmonte
Ne peut des fautes euter.
Parle lors que taire peut nuire.
Ce que sçais, à propos vien dire :
Ce que ne sçais n'en parle point.
Mensonge et poison mesme chose.
Plustost disant vray per ta cause,
Que vaincre mentir bien a point.
Honore et reuere le sage
Comme du Dieu viuant l'image.
N'honore aucun pour son auoir :
L'homme riche se sauue à peine.
O, qui tiens iustice et domeine,
Crain Dieu qui ha sur toy pouuoir.
Fay beaucoup et ne promé guiere.
Toute passion est meurtriere
De la vraye et droite raison.
Tout ce que l'ame fait troublee
En sa passion aueuglée,
Porte vn remors en sa saison.
Enuers tous hommes te comporte
D'vne amitié qui ne soit morte,

Comme apres Dieu en prenant soing.
Qui mal des autres hommes vse
Luy mesme de soy mesme abuse.
Dieu n'oit qui n'oit qui ha besoing.
De son auoir le vilain riche,
L'homme sage du temps est chiche:
Qui n'aime le sage il se hait.
Ce que Dieu liberal te donne
Aux autres liberal redonne.
Qui pense à forfaire, a forfait.
Il n'est en nous de tousiours viure,
Mais il est en nous de bien viure.
Ne fai mal à nul : fut-ce à droit,
Tresbon seroit ne faire offence :
Faitte l'offence, repentance
Nous rachemine au chemin droit.
Dieu parle quand on oit vray dire,
Ce qui ne peut à l'ame nuire,
A l'homme ne nuit pas aussi.
L'homme ingrat, ingrat ne te face.
Tu as le guerdon et la grace
Du bien que fais par gloire ici.
Dieu ne cognoist qui Dieu ne prise :
Qui à l'homme nuit, Dieu méprise.
L'homme qui pense que Dieu soit
Et qu'il n'a soing de nul afére,
Ce mal croyant rien ne difére
D'vn qui Dieu ne croit ny decroit.
Nul il ne craint qui nul ne blesse.
Se cognoistre est la grand' sagesse :
Qui sçait qui l'a fait se cognoist.
Vn preud'homme est de Dieu l'ouurage :

Mesme se taisant l'homme sage
Honore Dieu qu'il reconnoist.
Nul ne peut tenir d'assurance
Les dons mondains : Nul n'ha puissance
D'oster les dons que Dieu depart.
Pour le pauvre aider ieûne donques.
Mieux vaut n'auoir choses quelconques
Qu'ayant beaucoup n'en faire part.
Estime ton corps la véture
De ton âme, et ton ame pure,
Du haut Dieu le temple honoré.
Tien donque ton corps net de blame
Puis que c'est l'habit de ton ame,
Temple où Dieu veut estre adoré.
Eleuant à Dieu ton courage
Commence par Dieu ton ourage :
Sans Dieu ne te faut rien oser.
Mesme dauant que prendre alène,
De Dieu la bouche et l'ame pléne,
Vien du labeur te reposer.





LANSAC, prosperer et bien viure,
Et la vertu pour guide suiure,
Aquiert vn precieux chapeau.
A tous aider, à nul ne nuire
Fait l'homme sur tous hommes luire :
Et la vie n'a rien de plus beau.
Il n'est point de peine assez dure
Pour punir celly qui l'eau pure
D'un puy public infecteroit.
Car l'eau publique estant inféte
D'un venin qu'un méchant y iéte,
Tout vn peuple empoisonneroit.
Toy qui es Roy, tes meurs atrempe.
Rien ne sert de fourbir la lampe
Qui ne mét de l'huyle dedans.
Qui aux petits oiseaux vont tendre,
Contrefont leur chant pour les prendre,
A leur iargon s'acommodans.
Plus déplaist vn sin au visage
Qu'en tout le corps du personnage
Vne bien grand' deformité. •
Aussi le vice tant soit mince,
Aparoissant dessus le prince,
Offence toute vne cité.

Que sert en mer sus la poupe estre
Du gouvernail patron et maistre,
Et ne sçavoir où le tourner?
Que sert à cheual en la pléne
Tenir en main la bride véne,
A qui ne sçait la gouverner?
Qui touche le fan de la truie,
Tant soit petit, il hongne et crie.
Et c'est qu'il ne porte ny lait
Ny toyson, ny chose qui vaille:
Et pour ce la peur le trauaille
Sachant que nul bien il ne fait.
Car viuant nul fruit il ne porte,
Et sçait bien que de sa chair morte
Et de son lard l'homme se sert.
Maudite soit la tyrannie
D'vn qui perd tout, durant sa vie,
Et sauue tout quand on le perd.
Certenement les bourreaux valent
Mieux que les Tyrans qui égalent
Aus meilleurs tous les plus méchans.
Car les bourreaux font la iustice
Des forfaiteurs. Par iniustice
Tyrans font mourir innocens.
La seruitude volontaire
Passeroit : mais qui se peut taire
D'vn sceptre en des indignes mains?
Nature est par trop offensée
De ne laisser pas la pensee
Estre libre aux chetifs humains.
Maleur règne où plus d'vn commande.
Vn seul à nous regir entande :

Ne recognoissons tous qu'un Roy :
Le monde vn Soleil seul endure :
Où plusieurs regnent, paix ne dure :
Nul à tous, chacun tire à soy.
Vn soit le Roy : vn vienne prendre
Les deuoirs que nous deuons rendre :
Vn seul commande absolument.
C'est chose plus aisee à faire
Au bon plaisir d'un seul complaire,
Que de plusieurs ensemblement.
Entre plusieurs regne l'enuie.
Chacun aguete en ialousie
L'un l'autre pour se decrucher :
Et pour trouuer son auantage
Voudroit (voire au public damage)
Son compagnon voir trebucher.
Soit le Roy tel que Dieu l'ordonne :
Mais ie pri Dieu qu'il le nous donne
Et le meilleur et le plus fort :
Tel que iamais ne die ou pense
Qu'il ne faut faire conscience
Pour estre Roy de faire tort.
Mais qui les innocens maintienne :
Mais qui les deprauez retienne
De faire mal, par sa rigueur.
Aux méchans donner auantage
Leur pardonnant, c'est faire outrage
Aux bons soumis à leur fureur.
Le Roy qui sera populaire :
Aux loix rien ne fera contraire :
Aimé non pas creint florira :
Ne croira nul leger langage :

Ne croira pas seul estre sage :
Selon nature vieillira.
Ne se laisse vaincre en merite ;
S'accompagne d'hommes d'élite :
Cognoisse qu'il est homme né,
Bien qu'en autorité royale,
Le diuin pouuoir il egale :
Pour ce à vertu soit adonné.
Quelque autre sache mieux, ou dire
Ou peindre ou forger ou écrire,
Ou soit en quelque art excellent ;
Mais le Roy sache avec prudence
Regir son peuple, la clemence
A la seuerité meslant.
Qu'en vertus grandes il surpasse
Les plus valeureux : et qu'il face
De ses meurs les publiques lois :
Que son exemple à tous éclaire :
Que n'ayant de conseil afaire
Il se conseille toutefois.
Qu'a ses amis vaincre il se laisse
Dessous la raison vainqueresse,
Pour vaincre tous ses ennemis.
Graue, non des mines seueres,
En comportemens ordinaires.
Ne soit ny bandé ny remis.
En ses œuures non reprochable,
En ses propos soit veritable :
Vainqueur non vaincu des plaisirs.
Franc, liberal, grand de courage,
Venerable, sçauant et sage,
Se temperant en ses desirs.

Quiconques est Roy, qu'il repense
Qu'il ha d'vn plus grand sa puissance,
D'vn Dieu qui est le Roy des Rois.
Que luy homme aux hommes commande
Honoré d'authorité grande,
Mais, qu'il commande par les loix.
Celuy qui dignement dispence
Les loyers dus, beaucoup auance
Et la iustice et la vertu.
Iugement droit tout mal dechasse :
Faux iugement tout bien terrasse
Et foule l'honneur abatu.
Vn Roy doit aimer sa patrie :
En oster l'affreuse turie :
Estre l'apuy des afligez :
Debeller les mutins rebelles :
Conseruer les suiets fidelles
D'amour non de force obligez.
De la bien heureuse prouince,
Où regne ce valeureux prince,
Bien loing la discorde s'enfuit.
La Paix y florist : l'abondance
Y répand ses fruits : et la dance
Et la ioye et l'amour la suit.
Des hommes la beniste engence
N'y gaste sa saincte semence :
Pource des dieux ils sont chers.
Femmes y sont chastes et belles :
Portent enfans, témoins fidelles,
Qui ressemblent à leurs maris.
Les sources de vin y bouillonnent :
Les ruisseaux de lait y foisonnent :

Les chesnes y coulent de miel :
Les toisons y sont fines sayes :
Le baume on y recueût des hayes.
La manne y rousoye du ciel.
Aussi les hommes charitables,
Entre eux humains et secourables,
Enuers Dieu sont deuotieux.
Et cueillans les fruits de leur terre
Ou ne voyent iamais la guerre,
Ou florissent victorieux.
Mais où les tyrans seignorisent,
Les sugets pieté mesprisent :
Outrage et violence ont cours :
La iustice gist terrassée :
La foy pour vn rien est faussee,
Bonté n'a suport ny secours.
La discorde y regne et furie,
Auec la sanglante turie :
Lits maritauls y sont souillez :
Les temples laissez en ruines
Par les sacrileges rapines
Sont profanez et depouillez.
Famine y court : peste y rauage :
Et ne fait pardon à nul age.
La guerre detruit les citez.
Par la pauure gent éplorée,
De la terre non labouree
En friche les champs sont quitez.
Le forfait trop commun irrite
Contre vne nation maudite
Du haut Dieu la pesante main :
Qui fait du Tyran la vengeance

Par le peuple en leur insolence,
Du peuple par le souuerain.
Piqué dans mon ame suiette
A l'éperon diuin, ie iette
Au vent ces versets epandus,
Messagiers d'auis profitables,
Pour eux qui se sentent coupables,
Desirant qu'ils soyent entendus.
Afin que nous trop fautifs hommes,
Qui fouruoyés du droit nous sommes,
Nous y radressions aduertis,
Regne la raison aueree :
La vertu florisse honoree,
Entre les grands et les petits.





TROISIEME LIVRE
DES
MIMES, ENSEIGNEMENTS
ET PROVERBES
DE I. A. DE BAIF



C'est belle chose que la ioye :
Mais quand Dieu les maus nous enuoye,
Courageux les faut supporter.
IOYEUSE en fortune ioyeuse,
La ioye, à iamais bien-heureuse,
Puisse en ta maison arrester.
Maille est bonne qui denier sauue.
Occasion derriere est chauue.
Au poil prenons-la : nous l'auons.
Qui veut auoir paix qu'il endure.
Pour euter plus grande iniure,
Peu de mal souffrir ne sçauons.

Qui change d'aduis, c'est le sage.

Fouls s'obstinent en leur courage.

Le temps meine tout à son poinct.

Aisément se remet nature :

A toute nouvelle auanture

Nouueau conseil vient bien à poinct.

Qui les mechans frape et rudoye

N'est pas cruel : mais Dieu l'enuoye

Executeur de son courroux.

Des maux il faut choisir le moindre.

Oing le mal qui s'aigrist à poindre.

Tant de cheuilles tant de trous.

Pareil à pareil ne commande :

Il rauist qui plus fort demande :

Qui ne s'appauurist s'enrichist.

Qui dit ce qu'il ne veut pas dire

N'a rien dict : mais qui se rettire

De la contrainte il s'affranchist.

Qui fait, où citoyens nous sommes,

Ce que font la plus part des hommes,

Ne fait ny faute ny forfait.

C'est perte, perdre vn auantage.

Mieus vaut qui destourne vn dommage

Que qui cherche vn gain tout à fait.

Ostons des forfaits la matiere.

Tost croit vne teste legiere :

Qui hante, prend les mesmes mœurs.

Coustume autant peut que le Prince.

Il est mal-content qui ne pince.

Nous auons d'estranges humeurs.

Peu vaut raison contre la force.

Nous n'en prenons sinon l'escorce :

Raison est l'ame de la loy.
C'est loy la raison naturelle.
En la royauté bonne et belle,
La loy viuante c'est le Roy.
Chacun à son fait doit entendre.
Faut informer et puis reprendre.
La voix d'un, la voix de pas un.
Tousiours aduise à la personne.
Malheur au malheureux ne donne.
Pense à part toy, suy le commun.
Fortuné entre tous est commune.
N'appellons pas cela fortune
A quoi le sage eust peu pouruoir.
Prince doit tout faire avec cause.
Iuge fin iuge fine cause.
Qui pense un mal, le doit sçauoir.
Relasche faite par contrainte
Quant et la contrainte est esteinte,
Relasche contre droict ne vaut.
En tout regarde à la pensee
Dont la relasche est commencee.
La grace faut où le gré faut :
Fort commande s'il admonneste.
Qui trop muse danger appreste.
Ferme est, ce que peut la vertu :
Un mal de maints maux est la source.
Ieunesse au vice non rebourse
La vertu n'estime un festu.
Le certain ne recertifie.
Franc se fait qui le deu denie.
Romps la coustume où gist forfait.
Loy par coustume s'interprete.

Où confession n'est suspecte,
Qui confesse prouue le faict.
C'est grand mal desobeissance.
Qui baille au mechant la puissance
Baille l'espee au furieux.
Qui bien fait honore et chastie,
Il entretient l'humaine vie.
Où les bons regnent tout va mieux.

La guerre ciuile ruine

Les deux partis, quand elle fine,
Perdant et qui gaigne et qui perd.
Concorde fait les beaux affaires :
Discorde fait toutes miseres,
De grands maux le presage appert.

O qu'on iurast sus grosses peines
Ce que iuroient dedans Athenes
Les ieunes de page sortans ;
Qu'on le iurast mais sans pariure,
Contre le tort pour la droiture
D'vn accord s'entresupportans :

De ne honnir les saintes armes :
De n'abandonner aux faits d'armes
Ny son rang, ny son compagnon :
De combattre et mettre sa vie
Tant seul, à part, qu'en compagnie,
Pour la sainte religion.

De ne laisser point sa patrie
En chose du monde amoindrie
A ceux qui apres nous viuront :
Mais comme leur deuoir commande
Leur bailler meilleure et plus grande
Qu'en l'estat où la receuront.


D'obeir tousiours comme sage
Au magistrat selon l'vsage,
Et de se ranger prouement
Aux loix de tous âges admises,
Ou autres par le peuple mises
Par vn commun consentement.
Si lon voyoit aucun ne craindre
Les loix abolir ou enfreindre,
Ne l'endurer : mais prendre soin
En troupe ou seul de la vengeance :
Et rendre la deüe reuerence
A Dieu qu'on appelle à tesmoin.
Homme ne fais à nul iniure :
Marche pensant toute droiture,
Dit Hipparche en son monument.
Sans droiture peu vaut vaillance.
Où tous tiennent iuste balance
Vaillance ne sert nullement.
Chacun vante sa mercerie.
Chacun son mal tres mauuais crie.
Il n'y a mal sans quelque bien.
Rien ne vouloir trop, l'heur consomme :
Toute autre chose sert à l'homme.
L'homme à l'homme ne sert de rien.
Les vertus font prou : mais Fortune
Fait en vn poinct plus que pas vne.
La vertu vaut en sa saison.
Fuir par fois c'est vertu grande.
Prou fait qui les hommes commande,
Plus, qui fortune par raison.
Mauuais achapt remord son maistre.
Mal fait sa puissance paroistre

Qui l'employe à blesser autruy.
Aisément s'apprend vilenie :
Malaisément elle s'oublie.
Peur se refreint moins que l'ennuy.
Prou de fureur la mort encourent,
Peu de raison à la mort courent.
Viure n'est viure seulement.
Bien-heureux qui bien mourir ose.
Bien viure est beau. C'est peu de chose
Viure tellement quellement.
De la vie où tout mal s'appreste,
Telle est quelquefois la tempeste,
Que la mort en est le doux port.
Qui traisne sa vie en misere
Sans à soy ny autre bien faire
Seroit plus heureux d'estre mort.
Grande honte aux hommes deust estre
Tous animaux naissans cognoistre
Ce qui leur sera sain ou non,
Fors l'homme seul : dont la naissance
Foible et nûe est sans cognoissance
De ce qui doit luy estre bon.
C'est pourquoy si l'homme rencontre
Quelque chose de belle monstre,
Comme salulaire il la prend,
Combien qu'apres en ait dommage.
L'vsage en est le maistre sage
Qui nous repret et nous apprend.
C'est vne vilenie barbare
Pour rendre son honneur plus rare,
Malins enuier son sçauoir.
Comme si pour eux c'estoit perte

D'autant de leur science ouuerte,
Qu'à des autres feroient auoir.
Chose de beaucoup desirée,
Assez ne peut estre asseurée,
Et ne se garde sans danger.
Nous mentons par accoustumance.
Fortune ha sur nous grand'puissance
Quand raison ne peut nous ranger.
Ta langue, rien que bien ne die.
La vraye vertu s'estudie,
De hair outrage et forfait :
De garder la pieté sainte :
De conseiller sans nulle feinte
Aux citoyens le mieux qu'on sçait.
Dessus sa langue auoir puissance :
Rien ne faire par violance :
Ses enfans dresser et nourrir.
Moyenner que la haine on laisse.
Qui haît le peuple et qui l'opresse.
Comme vn ennemy le courir.
Contre femme point ne debattre.
Les valets yures point ne battre,
Pour ne sembler yure comme eux.
Son pareil prendre en mariage.
Qui s'allie à plus haut parage,
Se lie à maistres outrageux.
Nul ne moquer par insolence :
Autrement le moqué s'offense,
Toy moqueur hay te rendras.
Ne te haulse pour la richesse :
Pour la pauureté ne t'abaisse.
Bien et mal en bien tu prendras.

Desbauche aux esprits est mortelle.
Cest homme-là mauuais i'appelle
Qui ne sera bon que pour soy.
Meilleur chemin que le vulgaire,
Il faut tenir, non pas contraire.
Au gré d'autruy ne te deçoy.
Il n'y a traison ny fallace
Que femme courroucee ne face
A l'appetit de se vanger.
La verité trop debatue
En fin se destruit abbatue.
Ce n'est guerir le mal changer.
Ne reproche pour vilenie,
A vn que le malheur manie,
Ce qu'il fait contraint du malheur.
Qui ne peut vaincre par vaillance
De son ennemy la puissance,
Soy-mesme vaincre c'est valeur.





CHEVERNY, qui pour chacun veilles,
De qui les discrettes oreilles
Aux bons auis prennent plaisir,
Puisses-tu gracieux te plaire
En ce mien recueil salutaire,
Tesmoin d'un non ingrat desir.
Si des sept sages de la Grece
Voulez ouyr l'humaine adresse
En tout ce voyage mortel,
O François, je veux la vous dire
Moy qui de Grece en France tire
Les fleurs du sçavoir immortel.
CLEOBULE premier nous chante,
En tout mesure est excellente.
Pere et mere faut honorer.
Soy bien du corps, soy bien de l'ame.
Aime d'ouyr : trop parler blâme.
Appren beaucoup : fuy d'ignorer.
SOLON dit le deuxieme sage :
Rien trop. Ne iuge en arbitrage,
Ou tu perdras celuy qui perd.
Fuy le plaisir où dueil se mesle.
Du silence les propos scelle,
Romp silence au besoin appert.

Contre pere et mere n'asseure
En debat ta cause meilleure.
Des amis acquier non pas tost,
Mais les acquis moins tost reprouue.
Qui d'obeir appris se trouue
Sçaura commander comme il faut.
Conseille en tout public affaire
Non ce que sçais plus deuoir plaire,
Mais le meilleur d'vn cœur ouuert.
Tout ce que verras ne reuele.
Sçachant, tay-toy. Iuge et decele
Le couuert par le descouuert.
Cognoy toy (dit CHILON tiers sage).
En beuuant n'vse grand langage.
Trop parlant tu pourras faillir.
Nul homme libre ne menace :
De menace vient le disgrace.
Les vieux honore pour vieillir.
De tes voisins ne va mesdire,
Si tu ne veux ouyr te dire
Des propos qui te fascheront
Aux nopces frugalité garde.
Aux festins des amis retarde.
En leurs aduersitez sois prompt.
Hay qui du faict d'autruy s'enqueste.
Beny le mort. Ta langue arreste,
Que ton penser voise deuant.
Monstre toy paisible et seure,
Que sans te craindre on te reuere.
Des outragez marche au deuant.
Regne chez toy. Refrein ton ire.
Chose impossible ne desire.

D'un malheureux ne te ry pas.
Quand tu marcheras par la ville,
Va de façon graue et gentile.
Les fous s'accusent à leur pas.
PITTAQVE le quatrieme sage
Dit, Qui respond aura dommage.
Ne crain pere et mere flatter.
En absence comme en presence
Des amis auoir souuenance.
Pour rien qui soit ne lamenter.
Tel comme enuers tes pere et mere
Te porteras, tel le salaire
De tes enfans rapporteras.
Iouyr d'un desir c'est grand'ioye.
Bien cognoistre à tous ne s'ottroye.
Ne croy tous ceux que hanteras.
Debausche nuit, paresse ennuye,
Ignorance poise à la vie.
Appren et monstre tout le mieux.
Gain par tout est insatiable.
Tien caché ton heur enuiable
Pour te sauuer des enuieux.
THALÈS dict le cinquieme sage,
Cognoy le temps. Mets en vsage
Ce qui est propre à ton besoin.
Ce que dois faire ne va dire,
Qu'y faillant n'apprestes à rire.
Cherche qui de toy prenne soin.
N'offense qui malheur endure
Que Dieu ne vange telle iniure.
Sçauoir l'aduenir donne ennuy.
Pour peu d'un amy ne se plaindre.

Croire la terre : en mer se feindre.
Ne fay ce que hais en autruy.
BIAS sixieme, dit, Nous sommes
Plus de mauuais que de bons hommes.
Ny badin ny malin ne soy.
Entrepren tard : mais vn affaire
Entrepris haste de parfaire.
Parle à propos : sans propos oy.
Si tu es beau, fay choses telles.
Si tu es laid encor plus belles
Courant ton naturel defaut.
Hay de parler à la legiere.
Sans forcer pren tout de maniere. *
Dieu est, dire tousiours il faut.
Ne dy louange flatteresse
De l'indigne pour sa richesse.
Si tu fais bien à Dieu le ren.
En ieunesse heur, sens en vieil âge.
Sinon pour vn clair auantage,
Pauure les riches ne repren.
Acquier au faict la souenance,
Au temps la discrete prudance
En mœurs la debonnaireté,
Au trauail continence dure,
En crainte la pieté pure,
En richesse amiableté.
En parole acquier la creance,
Honneur et grace du silence,
Iustice d'vn sens droict et bon,
La vaillance par hardiesse,
L'autorité par bonne adresse,
La primauté par bon renom.

Pense le tout, dit PERIANDRE
Septieme sage. Il faut l'apprendre.
Gain deshonneste est grief acquest.
Le public plus qu'un tyran ose.
Estre posé c'est belle chose,
Brutiueté dangereuse est.
Faulses voluptez sont mortelles,
Vrayes vertus sont immortelles.
Quier loz viuant, Mort bien-heurté.
En heur modeste, en malheur sage,
Monstre aux amis mesme courage
Comme en l'heur en l'aduersité.
Mieux vaut mourir faisant espargne
Que viure souffreteux en hargne.
Fay toy digne de tes parens.
Celuy que de ton gré accuses
D'estre mechant, si tu en vses,
Coupable auecque luy te rens.
Comme pour r'estre amy, querele.
Fay le secret. Ton malheur cele
Pour n'esiouir tes ennemis.
Vieilles loix et viande fresche.
Le punir n'est rien s'il n'empesche
Que le forfait ne soit commis.
Ainsi les sept Sages deuisent
Chacun à part : Mais ce qu'ils disent
En comun, ie veux rapporter.
Ly-le et l'enten : ie va l'escire.
Tu feras bien si viens le lire
Pour l'entendre et l'executer.
Suy Dieu : sers Dieu. Crein pere et mere.
Fay joug au droit. Sçachant va faire.

Commande toy. Fuy le serment.
Choy' l'amy, l'ennemy repousse.
Fay toy bien. Soit ta façon douce.
Donne tost. Acquier iustement.
Garde le tien : l'autruy ne touche.
Escoute tout : tien bonne bouche.
Ayant dépar : n'enuie aucun.
Atten le temps : le plus fort doute.
Retien ton œil : de l'heur fay doute.
Ne maudy nul, beny chacun.
Fuy le remors : ta faute amende.
Aborre haine, paix demande.
Veux ce que peux, le receu ren.
Appren tousiours. Hay calomnie.
L'espoir loüe : aux biens ne te fie.
Le vieil respecte : au ieune appren.
Plains l'affligé. De clemence vse.
Sage au peril. L'absent n'accuse.
Ne blasme nul. Dy bien du bien.
Hay le tort : fay bien, sans dommage.
Iouy mortel. Croy le plus sage.
Ne ry du mort Acheue bien.





Rien ne fait tant l'homme semblable
A Dieu, que d'estre veritable.

La touche espreuve l'or, CRAMEL :
Verité quand elle s'y treuve,
L'integrité de l'homme espreuve.
Sans elle il n'y a point de sel.

La mensonge et la befferie,
Et la taquine tromperie
Suit l'ame qui na point de Dieu.
Qui craint Dieu, qui l'aime et l'adore,
De verité sa bouche honore :
Parle net en tout temps et lieu.

Mentir c'est fait d'une ame vile.
Dire vray c'est chose gentile
Qui affiert au cœur genereux.
Qui ment et fraude sa promesse,
Ou d'intention tromperesse
Ou par sottise, est malheureux.

O Verité concitoyenne
Des bons Dieux, à toy ie me tienne,
Faysant mon seur appuy de toy :
Toy ne permets que ie chancele
Par le faux : le vray ne me cele :
Tout le droit chemin meine moy.

Des malades ceux qui ne sentent
Leur mal, et point ne s'en lamentent,
Sont les malaisez à guerir.
Reconnoissez bien vostre faute :
De nuict le feu sus la tour haute
Garde les nochers de perir.
Maints peuuent aux bons secourables
Veritables et fauorables
Acquerir du loz à leur nom.
Mais taquins, nul d'eux ne desire
Faire bien, nul ouyr bien dire
De bien faire ayant le renom.
C'est vne bien grande sottise,
Et i'oseroy dire bestise,
Viure homme, et viuant ne sçauoir
Quel est le vray deuoir de l'homme.
C'est la bestise à la grand'somme,
Sçauoir et manquer au deuoir.
Estant cela pourquoy nous sommes
Vrayment hommes aux autres hommes,
Nous sommes Dieux par entre nous.
Mais estant et nous portant autres,
Corrompant les natures nostres,
Alors nous entre-sommes loups.
Le ry. O que c'est grand' folie
Que d'aller au prix de la vie
Encontre le cours du marché.
Quand le vice la vertu braue,
La vertu se cache en la caue,
Le vice on haulse recherché.
Viuous viuous c'est la coustume :
Après la douceur l'amertume :

Laissons passer les plus chargez.
Qui fait bien perd et grace et peine.
La presse des plus forts m'emmeine.
Les bons s'en vont descouragez.
Qui de faire bien vous degouste
En cela qui rien ne vous couste ?
Du vostre rien : et toutesfois
De peur qu'aux bons bien on ne face
De vos estats on nous efface
Entre tant de cousteux desrois.
Vous me raclez de vostre liure
La grace qui m'aidoit à viure.
Si vous ne la m'y remettez,
Sur vous cherra la male-tache :
Faut que de mes papiers i'arrache
Vos honneurs et noms reiettez.
Malheureux qui sans valeur braue :
Malheureux qui se rend esclau
Sous des ignorans malheureux ?
Malheureux qui les bons irrite :
Malheureux le bon, qui merite
Des ingrats, en vain valeureux.
Que sert la valeur sans la grace ?
Que sert humblesse où regne audace ?
Sagesse où la sottise a cours ?
Modestie où morgue impudence ?
Sçavoir où commande ignorance ?
Bon ordre où tout marche à rebours ?
C'est tout de faire bonne mine :
C'est tout monstrier l'ame diuine
Par vn eshonté tonnément
Haut sonnans ses vaines paroles,

Se vantant danser aux caroles
Des Muses plein d'estonnement.
C'est plus d'une façon facile
Mener le ruisseau de son stile
Par vn chemin non raboteux.
C'est plus de ciuiles miseres
Faisant l'entendu aux affaires
S'enrichir sans estre honteux.
Qui a, peut en auoir encore.
Qui n'en a point nul ne l'honore,
Fust-il Orphee ou Arion.
Sçauoir ne vaut sans artifice.
L'estat, l'office et benefice
Viennent de là par fiction.
Qui ne sçait contrefaire et feindre
N'y peut paruenir ny atteindre.
Reua-t'en si tu es naif.
Tu es ouuert, franc, debonnaire :
Et pource tu ne sçauois plaire.
Que feras-tu pauure Baif?
Nul tout à fait tu ne courtises.
Tu hais de souffrir leurs vantises.
Tu n'as nul espoir qu'au bon Roy.
Ton esprit en vain tu trauailles,
Et penses tu bien que tu vailles
Qu'un Roy se souuienne de toy?
Resoù toy la Cour plus ne suiure :
D'ambition plus ne t'enyure :
C'en est fait : tu n'y vaux plus rien.
Retire toy. Passe t'en donques :
Et raccourci tes robes longues :
Et de la Cour n'atten du bien.

Autre plus grand bien ne souhaite
Sinon que le Roy te permette
Ouvrir tauerne ou cabaret.
Tien toy à ta maison de l'Ange,
D'un maigre espoir ton cœur ne mange :
Vien semer un meilleur gueret.
Dieu que c'est chose forte à faire,
Ce qui n'est à dire bien taire.
Je parle trop, ie le sens bien.
J'en veux à ces peu secourables :
A gens comme moy miserables
Laisser dire ne couste rien.
Ce que ie dy n'est calomnie.
Je parle trop : et ne le nie.
Mais il faut parler ou creuer.
Les premiers ils m'on faict outrage :
Patience outree tourne en rage.
Malheur à qui me veut greuer.
J'aime les bons et les honore,
Les mechans par force j'adore :
Je les maudis en liberté.
Je suis chez moy : i'y puis tout dire.
Le secret par le vin et l'ire
Est descouvert en la clairté.





SCEVOLE, si nous viuions Princes
Riches de peuples et prouinces,
Theatres nous leur bastirions,
Leur edifirions des hauts temples,
Porches et palais beaux et amples.
Mais possible mieux ne ferions,
Que faisons ainsi que nous sommes
Pour aider le commun des hommes :
Quand des aduis leur proposons
Pour heureusement et bien viure.
A leur dam s'ils ne veulent suiure
Ce que chanter nous leur osons,
Puis que les propos veritables
Ne sont ouïs, contons des fables :
Possible on les escouterà.
Esopet les fit par l'oracle,
Pour en riant faire miracle
En l'esprit qui les gousterà.
Vn Loup ayant faict vne queste
De toutes parts, en fin s'arreste
A l'huis d'vne cabane aux champs.
Au cry d'vn enfant que sa mere
Menaçoit pour le faire taire
De ietter aux loups rauissans.

Le loup qui l'ouit en eut ioye,
Esperant d'y trouuer sa proye :
Et tout le iour il attendit
Que la mere son enfant iette.
Mais le soir venu, comme il guette,
Vn autre langage entendit.
Car la mere qui d'amour tendre
Entre ses bras alla le prendre,
Le baisant amoureusement
Auecques luy la paix va faire :
Et le dorlotant pour l'attraire
Luy parle ainsi flateusement :
Nenny nenny, non non ne pleure :
Si le loup vient il faut qu'il meure :
Nous tûrons le loup s'il y vient.
Quand ce propos il ouit dire,
Le loup grommelant se retire.
Ceans lon dit l'vn, l'autre on tient.
Vne autre d'vne autre maniere.
Vn serpent auoit sa taniere
A l'huis d'vn paisan bucheron :
L'enfant du paisan ne s'auise
Qu'il marche la beste surprise,
Qui le mordit par le talon.
Le venin dans les veines glisse :
Et soudain sa froide malice
Montant iusqu'au cœur l'estouffa.
L'enfant mourut : le pauvre pere
Et de douleur et de colere
Contre le serpent s'eschaufa.
Pour vanger son fils, sa congnee
Il a sus le champ empongnee,

Se plante au goulet du serpent.
Et tant attendre delibere,
Que celle mechante vipere,
S'elle sort, il tue l'attrapant.
Elle de son meffait coupable,
Cauteleuse et non deceuable,
Guette autour deuant que sortir.
Le pere, hastif de vengeance,
Vn coup de sa congnee elance
Cuidant la beste mipartir.
Mais il la faillit, car la teste
De la beste à se plonger preste,
Dedans le trou se recacha.
La congnee à faute chassée,
D'une taillade en long tracee,
La roche du goulet trencha.
Ceste vermine ainsin euite
La vengeance et la mort subite.
A iamais du iuste courroux
La marque sus le trou demeure,
Qui l'aduertist qu'il ne s'asseure.
Aussi ne fait le serpent roux.
Car par le conseil de sa femme
Le paisan le serpent reclame
Et le recherche à faire paix,
En mettant deuant la tanriere
De celle vipere meurtriere
Du pain et du sel tout exprés.
Mais le serpent qui ne s'y fie,
Caché dedans son trou luy crie :
Iamais la paix ie ne croiray,
Tant que la sepulture proche

De ton enfant, et sus ma roche
Ce grand coup marqué ie verray.
Maintenant ie diray la fable
Du sot Cheual et miserable,
Qui sa force ne cognoissoit :
Que le cerf avec l'auantage
De sa ramure, d'vn gangnage
Leur commun herbis dechassoit.
S'en vanger le cheual desire :
Qui droit à l'homme se retire,
Et deuers luy ayant recours
Luy conte le tort qu'il endure,
Et luy requiert de telle iniure
La raison avec son secours.
L'homme trompeur luy va promettre,
Si le cheual se laisse mettre
Vn frein en la bouche, et s'il veut
Qu'armé dessus le dos luy monte,
Et qu'il le meine et qu'il le donte,
Que du cerf vanger il se peut.
Le badin cheual s'y accorde :
Luy tarde que son mors ne morde.
Mais si tost que le mors eut mors,
Tant s'en faut que du cerf se vange,
Que l'homme l'asseruist et range
Esclaue à iamais par le mors.
O que par tout l'âge où nous sommes
Ceste fable vraye atteint d'hommes!
Vn vieillard fut qui grisonnoit
Amoureux de deux concubines,
Toutes deux mauuaises et fines,
Ausquelles il s'abandonnoit.

L'vne vieille, l'autre ieunette :
L'vne faulse, l'autre saffrette.
Quand la ieune le peut tenir,
Oste le poil blanc qui la fasche :
La vieille tout le noir arrache,
Et le font chauue deuenir.

Trois beufs dedans un pasturage
Paissoient d'accord : et nul outrage
De beste qui fust n'enduroient
Tant qu'ils vesquirent en concorde.
Entre eux se fourre la discorde:
Loups et lions les deuoroient.

Un de nuict les hauts cieux regarde
Et les astres : et par mégarde
Dans vne fosse creuse cheut.
Vn passant l'oit qu'il se lamente.
Entend sa cheute et sa descēte :
Et s'en rit quand la cause il sceut.


Tu es là fort bien par ta faute,
Toy qui leuant la veüe trop haute
Au dessus de toy regardois
Curieux de chose couuerte,
D'vne fosse à tes pieds ouuerte
Nonchalant tu ne te gardois.

Un Porç-espy (belle deuisse
Du Roy Louys, Roy d'entreprise
Pere du peuple surnommé.)
Porc-espy nourry dans l'Afrique,
Porte mainte fleche qui pique,
De sa nature ainsin armé,
Qu'en se herissonnant il lance
Contre qui vient luy faire offense.

Le loup qui ce porc aguettoit
Luy conseille qu'il se descharge
De tant rude et pesante charge,
Puis que nul besoin n'en estoit.
Mais quand il en auroit affaire
Qu'il reprist l'espy salutaire.
O loup i'en ay desia besoin,
(Dit le porc-espy) tout asteure.
Du loup la rencontre n'est seure
A qui a ses armes au loin.
Le Herisson estoit en peine
Où se loger, la Marmoteine
Il pria le vouloir loger.
Ce fut aux mois de la froidure,
L'hiuer quand la saison est dure.
Elle accorda le heberger.
Ainsi le meine en sa taniere,
Où l'hoste nouveau ne fut guiere
Que son hostesse ne faschast,
Auecque son escarde droite.
Car la place fut si estroite
Qu'il falloit que lon se touchast.
La marmote pria son hoste
Le lendemain matin qu'il s'oste
De son logis. Le herisson
Qui trouue la maison fournie
De ce qu'il faut, tresbien luy nie
Et luy chante vne autre chanson.
Si quelcun en ce lieu s'offense
Qu'il s'en aille, ie l'en dispense,
Quant à moy ie n'en bougeray.
Si loger en ce lieu t'est peine,

Tu peux desloger, marmoteine.
De l'hyuer n'en deslogeray.
L'Aigle fondant cruelle et fiere
Au sortir de la rabouliere
Auoit troussé des lapereaux :
Et sur vn haut chesne en son aire
Les auoit portez pour en faire
Gorge chaude à ses aiglereaux.
La haze la prie les luy rendre.
L'aigle pitié n'en daigne prendre,
Mais d'orgueil se va surhausser.
La haze tous counils assemble :
Et fait qu'ils s'en vont tous ensemble
L'arbre de l'aigle dechausser.
Tant grattent, tant rongent, tant minent,
Que tout le chesne ils deracinent.
L'arbre la nuict tombe poussé
Au premier vent. L'aigle endormie
Et sa couuee y perd la vie
Parmy le branchage froissé.





RENAVT, ta parole non vaine,
Et ton integrité certaine,
Loin de tout mensonge et de fard :
Et ta façon, non point couuerte,
Mais franche à l'œil de tous ouuerte,
D'une naïfueté sans art,
M'ont obligé de telle sorte
Que iamais n'en tombera morte
La grace à la posterité.
Debout paresseux à bien faire.
Ny le bien-fait ie ne puis taire,
Ny du mal fait la verité.
Hay avant, tost tost, laissez courre.
Decouplez : laissez les escourre.
Ils vont sus les voyes, suiurons.
Clabaud, miraud, bize, fregonde,
Galehaut, miremont, mironde,
S'ameutent, et nous retiuons.
Tran tran tran, la beste elancee
Tire pays : cy est passee.
Ie le cognoy par le parpié.
Qui plaisir fait, plaisir demande.
De courte ioye douleur grande.
Laissez dire et n'y prenez pié.

Au cours du marché dois entendre :
Le temps comme il vient te faut prendre
Au bon entendeur vn bon mot.
De bon matin s'est ebourree.
Fagot a bien trouué bourree :
La Marmotaine a le marmot.
La fille de geline grate.
O cœur mechant ! ô ame ingrate !
Fouler aux pieds telle beauté !
Tu sens où le soulié te blesse :
Sous beau visage maigre fesse,
Toute rage et deloyauté.
Trois iours deuant que le vent vente
Le le preuoy. Le fait n'eunte :
A trompeur trompeur et demy.
La mere d'vn couard ne pleure :
En vn estat rien ne demeure :
Si l'heur tu pers, tu pers l'amy.
Conseils sus conseils ordinaires.
Iamais ie ne vey tant d'affaires :
Nous en sommes tous embrenez.
Nageras-tu point sans nageoire ?
Quand volerons-nous outre Loire ?
Nos sacres sont allebrenez.
Peu vaut doctrine sans prudence :
Grand poudre fait vieille qui dance :
Voyez marcher ce traquenard.
Si tout le meilleur de la tire,
Nostre party bien fort empire.
A peine prend on vieil renard.
En Prouence les becafigures
Dessus tous fruits aiment les figes,

Icy les griues les raisins ;
Vn ventre creux n'a point d'oreilles :
Tu nous voudrois conter merueilles.
Après la mere les gorins.
Je me tairay s'il vous ennûye.
Grand vent s'abat de peu de pluye.
Je ne dy pas qu'il le vainquit,
N'assau le sanglier en sa bauge :
Le pourceau gronde mesme à l'auge.
Il vesquit bien, tant qu'il vesquit.
Il n'y a plus ny rang ny ordre.
Si fasche-til fort de demordre
Après que lon a bien amors.
Mon mors ainsi ma bouche gaste,
Dit la Rosse : fol qui se haste
Pour cela luy oster le mors.
Vne queux qui ne coupe, aguise.
Chacun (dit-on) fait à sa guise.
Mais sera-ce là le payment
D'auoir si bien fait la desfaite ?
L'ennemy qui fait sa retraite
Mieux etoré fuit brauement.
Qui fait bien, quand le mal profite,
Il fait mal et n'a nul merite.
Bien sert oublier ce qu'on est.
Ce que tu peux bien perdre, pèr-le.
Dieu gard l'vnique et ronde Perle
A qui honneur et vertu plaist.
Je croy mes yeux non mes oreilles :
C'est donc à rendre des pareilles ?
Il faut du faict non du caquet.
Où c'est qu'aujourd'hui nous en sommes !

A la foy lon trompe les hommes,
Les enfans au billeboquet.
Bonne terre bon blé rapporte.
Ne croy femme fust-elle morte.
Eau, femme, feu, ce sont trois maux.
Vn bon feu la maison honore.
Mauvais feu la maison deuore.
L'homme est le Roy des animaux
La mer guerist l'ame offensee.
Dieu te doint entiere pensee.
Le vice est pres, loin la vertu.
Tous ne sont fous d'vne folie.
Les renards aux lions n'allie.
Dy general, qui, d'où es-tu?
Il est noble qui a l'audace.
Qui perd honte anoblist sa race.
Le craintif sa noblesse perd.
O grande beste à tant de testes
Vous n'estes vous tous que des bestes
Vous entre-mangez, il y pert.
Garde garde la reuerdie.
Si la vilenaille estourdie
Se recognoist : libres Cantons
Nous allons querir vos polices.
De nos mangereaux les malices
(Ce dirons-nous) nous esuentons.
C'est ainsi que le monde tourne.
La nuict surprend qui trop seiourne.
De gueux se font Rois, de Rois gueux.
A l'enfant ne baille vne espee,
Ny au guenon vne poupee :
Si ne veux qu'ils facent leurs jeux.

La Renarde et l'Aigle vont faire
Amitié. L'aigle fit son aire
En la sime d'un arbre haut.
Au pié de l'arbre la renarde
Vn buisson fort espais regarde
Où son terrier gratter luy faut.
La Renarde en fin deuient pleine :
Fait ses petits. En mesme peine
En mesme temps l'Aigle se veit.
Alla couuer et la couuee
S'esclost au Solcil esprouuee.
Oyez ce qui s'en ensuiuit.
La renarde vn iour fut en queste :
Et se fioit la sotte beste
Que l'aigle ses petits gardast,
Ou qu'elle attendist le partage
Du commun butin et carnage,
Ou qu'elle en ayant les aidast.
L'aigle eut faim. De son aire aduise
Les renardeaux, en fait la prise.
Auec ses aiglereaux s'en paist.
La Renarde estant reuenue
Trouue son engence perdue.
Sçait comment, et fort s'en desplaist.
Et bien que ses petits lamente,
Plus que leur perte la tourmente
Le desespoir de s'en vanger.
Ce qu'elle peut en sa destresse
De maudire l'Aigle ne cesse,
Qui ses petits a peu manger.
Bien tost apres hors d'un vilage
Non loin de là, selon l'usage

Vne chéure on sacrifioit.
L'aigle fond durant le mystere :
Emporte le ventre en son aire
Auec vn charbon qui ardoit.
Il ventoit. De mainte buchette
De bois sec son aire estoit faicte.
Le feu s'y prend à tous les bouts.
Les aiglereaux tombent et l'aire.
En la presence de leur mere
La Renarde les mange tous.
O grande forest où les chesnes
Dedans les eaux portent des chesnes
Et des vases d'or et d'argent :
Gardent toy qu'vn iour les charrues
Ne voient sillonnant tes rues,
Le sang que tu beus reuangeant.
Par vn serpent les loups qui firent
Le massacre punis mordirent
Leur grande mere. O iustes Dieux !
Ne t'en ry pas toy toy qui restes.
On va iouer à toutes restes.
Ne me croyez, croyez vos yeux.
Il est valeureux qui est sage.
L'homme sage et de haut courage
Ses batailles bien rangera.
Choquant gaignera la victoire.
Couronné d'honneur et de gloire
Les outragez reuangera.
L'assurance suit la prudence.
Celuy qui rien que mal ne pense
En fin sera fol descouuert.
Toy qui es bon, pren la tutele

Des bons d'un fauorable zèle.
Dieu conduira ton cœur ouuert.
Si le sucre est doux à ta bouche,
Si la vertu le cœur te touche,
Plus douce elle te semblera.
Iamais l'homme de bien ne gréue,
Sept fois chet, sept fois se releuc.
Le mechant ne releuera.
Par le champ du fay-neant ie passe :
Par le clos du fou ie repasse.
l'y voy tout en friche laissé.
Ce ne sont qu'espines, orties
Et ronces. A la faim tu cries,
D'un mal bien deu bien oppressé.
Le ventre plein trop mieux conseille.
Quand verrez taire la corneille
Le cygne vous orrez chanter.
Ou Roy ou asne te faut estre.
Bon valet se fait du bon maistre :
Deuant que faire il faut tenter.
Des lions la forte vieillesse
Surmonte des fans la ieunesse :
L'aigle ne compare au hibou.
Ne porte bague qui te serre.
Sage au sage ne fait la guerre,
Si fait le fou contre le fou.
L'un à la proüe et l'autre en poupe.
L'un pile tout, et l'autre coupe.
L'autre le rait iusqu'à la peau.
Qui se va trainant sus le ventre :
Qui part, qui vient, qui sort, qui entre.
Qui fait le duc, qui fait le veau.

Qui met au jeu, qui s'en retire.
Tu pourrois bien trop nous en dire :
Tout est bon qui bien maschera,
l'enten d'une saine personne.
Prou de remedes on ordonne,
Cherchez qui vn seul en fera.





A bord à bord, à nage à nage,
Compagnons gagnons le riuage,
La tourmente va se leuer.
Le grand plaisir d'une falaise
Voir en l'eau la nef au malaise,
Duquel aurons sceu nous sauuer.
En lieu d'un sage le fou monte
En la chaire. C'est grande honte
Que les sages sont tous muets.
Aux porcs ietter les marguerites!
Que te seruent tes fautes dites
Si les oyant pire tu es?
O vous François, tous deplorables,
Pourquoy delaissans miserables
Le bien de viure en tout plaisir,
N'auons autre soin ny affaire
Que par la guerre vous mal faire
D'un vangeur et cruel desir?
Est-ce vne fortune mechante
Qui vous tracasse, presidante
A vostre viure malheuré?
Qui ne sçait que c'est de bien faire,
Bouleuersant d'un sort contraire
Tout vostre estat mal assuré?

Car Dieu de vos maux ne se mesle :
Mais la diablesse pesle-mesle
Vous poind d'vne aueugle fureur
Pour vous donner peine en tristesse,
A vous qui viuriez en liesse
Si recognoissiez vostre erreur.
A bon conseil sourdes oreilles.
Des fraizes pren les plus vermeilles.
A chair de chien saulse de loup.
A l'asne dur, dure courgee.
La vieille pestelle enragee
S'elle n'a cheuille à son trou.
Poule se taist deuant que pondre.
Après raire n'y a que tondre.
A rebelle chien, dur lien.
Ce que luy fais, de l'homme espere.
Bonne est sa foy fust-ce à mal faire.
Qui perd la foy ne perd plus rien.
Douces promesses les fous lient.
Les mechans aux mechans s'allient:
Les bons se decourent des bons.
Dieu pour tous : chacun a soy tire:
Ce sont mots qu'il ne faut plus dire.
O que de saults ! ô que de bonds !
Male cause pitié demande.
L'innocent du mal bien attende.
Iuge doux au mal, le mal fait.
Le chat sçait quelle barbe il liche.
Qui est content, il est prou riche:
Plaisir reçoit qui plaisir fait.
Peu et paix : c'est Dieu qui le donne.
La robe ne fait la personne.

Maint fol de sage prend l'habit.
Heureux qui en enfans prospere.
Qui songe bien, pourra bien faire.
Après le don le gré perit.
Un pescheur son veruein accoustre,
Le tend : le laisse là : passe outre.
Puis reuient troublant le ruisseau.
Quelcun dit voyant ce peschage :
Tu gastes l'eau nostre breuage :
Rien ne prendroy sans troubler l'eau.
Hastez-vous, hastez de l'escire,
Car ie suis pressé de le dire.
Devant que voir les raisins meurs,
Tel parle haut, tel fait le braue,
Qui mangera bien doux sa baue :
Change de loix, change de meurs.
Desir d'auoir, l'estat derange.
Si le serpent serpens ne mange
Il ne deuient iamais dragon.
A maintes gens comme tout passe.
Le masque vaut mieux que la face.
La porte s'ouure sur le gon.
Tel feint la toux qui son pet cache.
Qui ne sçait qu'il veut dire, crache.
Tel mouche qui n'est pas morueux.
Sont vieilles ruses et deffaites.
Mais si voulez bien faire, faites :
Prenez la fortune aux cheueux.
Crache en ton sein qui autruy blâmes.
Tu le payras si tu l'entames.
Nos estalons sont harasses.
Au miel souuent se prend la mouche.

Voyez vn peu sainte-nitouche.
Qui le pié tient, escorche assez.
Le Satyre vne fois et l'homme
Furent amis. Luy voyant comme
L'homme souffloit dedans ses doigts,
Luy demanda qu'il vouloit faire.
Eschauffer mes doigts. Au contraire
Sa soupe il souffle vne autre fois.
Encore s'esmoya le Satyre
Pourquoy c'estoit. L'homme va dire :
C'est pour ma soupe refroidir.
O faux homme qui d'vn trou mesme
Souffles chaud et froid, ie ne t'aime.
Onques puis ne vit le Satyr.
Le vent qui souffle et nous empresse
Est si malin, qu'il ne nous laisse
Ny demeurer ny auancer.
Tray celle qu'as en ta saisine.
Il gagne païs qui chemine.
Le bruit qui court vaut y penser.
Le plus fou seul, à par soy pense.
Il va qui danse, qui va danse.
Plus fait craintif que trop hardy.
Mal-aisé n'est pas sans peine.
S'il n'a soif l'asne à l'eau ne meine.
Mieux fait le long que l'estourdy.
Le fou rit quand il ne faut rire,
Le fou dit ce qu'il ne faut dire.
Vengeance croist au long aller.
Du bien fait la grace ne dure.
Tousiours vient au runje l'iniure.
Tay toy plustost que mal parler.

Vange le tort sans ton dommage :
Pense toy mortel, tu es sage :
Chacun busche au chesne abbatu.
Insatiabilité des hommes
Tu nous destruis tant que nous sommes.
Les chiens pelissent le battu.
Le cœur malin le mal desire :
Petit present abat grande ire.
Homme de bien le bien feras.
On ne perd guiere à la pareille.
Aux pauvres te bouchant l'oreille
Tu crieras qu'ouy ne seras.
C'est des plus grands la maladie
Se moquer de quoy qu'on leur die.
Fors ce qu'ils ont en volonté.
Boule la boule à la descente.
Suy le chemin, ie pren la sente.
Quelcun se sera méconté.
Les bons ont tort si le bon souffre.
A nul la bonne heure ne s'ouffre
Qu'vn autre la mauuaise n'ait.
Le vice rit quand vertu pleure.
Mauuais auance et bon demeure.
L'heur du peruers n'est iamais net.
O m'amie tant tu es belle!
Sans tout cela de beau qu'on cele.
Tes yeux ce sont yeux de coulons.
Tes cheueus sont troupeaus de chéures.
C'est escarlate que tes léures.
Tes dents sont troupeaux de moutons.
Moutons qui apres la tondure
S'en viennent lauez de l'eau pure,

Fans de portieres tous gemeaux.
Ta ioüe ny blesme ny fade
C'est vne piece de grenade,
Tes deux tetins sont deux cheureaux.
Ces deux cheureaux gemeaux bondissent,
Entre les beaux lis, qui florissent
Blancs le matin au point du iour.
Tu es toute belle m'amie.
En toy n'a tache ny demie.
Vien donque vien donque m'amour.
Que dy-ie? que fay-ie? resué-ie ?
Qui m'en sera garand et plege?
Ce sont des mots du temps passé :
Ou c'est le songe d'un malade :
Ou c'est plustost vne salade
De tout meslange ramassé.





Au feu au feu, nostre puy brûle :
Nostre chien brait, nostre asne hûle :
La charrue va deuant les beufs,
Les eaux reboursent aux fontaines :
Lon casse les bestes à laines :
Et maintenant lon tond les œufs.

Harpies aux griffes aigues :
Ostez jettez ces bezagues
Qui vont trenchant par les deux bouts.
Ce n'est que toute porcherie.
Tout est cosni : la bergerie
Ha moins de chéures que de boucs.
Se pendre qui se voudra pendre :
Quoy ? d'une clef la busche fendre ?
D'une coignee la porte ouurir ?
Qui du premier mal ne se tire,
Le mal vn autre mal attire.
Le secret se va decouvrir.

Venons au point : parle, ou m'écoute.
Cela ? cela n'est qu'une goutte
De vin dans vne pipe d'eau.
Changeons les mauvaises coustumes.
D'un loup n'allons chercher les plumes :
Ne faisons vn limier d'un veau.

Peu parler : vne froide mine :
Vne toux seche : longue eschine :
Mon Dieu ! Iesus ! vn ris de chien.
Quoy que soit, bonne soupe grasse.
Faire la mouë et la grimasse.
Renuerse tout, tout ira bien.
Pour luy benefice, à moy blanche.
Que tu fusses bien à ta banque:
De mechant corbeau mechant œuf.
Tout n'en vaut rien, armes ny plume.
En le soufflant le feu s'allume.
Il prend qui va languillanneuf.
Se fier en Dieu rien ne gaste
En mettant la main à la paste.
Tu as beau crier Iupiter
Iupiter ren moy ma coignée.
Va chanter la mal assignee.
L'autre pourroit s'en despiter.
A des mines faut contremines.
Nous verrons bastir des ruines
Des vieux manoirs neuues maisons,
Où es-tu grand lipu d'Autriche?
Si tu viuois tu fusses riche
Tu n'as laissé que des oisons.
Pleust à Dieu qu'elle fust encore
La chimere qui nous deuore
Recluse en son cloistre nonnain.
Nos hommes ne sont que des couilles.
Faux apostat tu nous barbouilles:
Tant de mal pour vn peu de pain!
D'vne forme tous pieds ne chausse.
Trop ne te baisse ny te haulse.

Ne scie la moisson d'autruy.
Du cuir d'autruy large courroye.
De grand' malice courte ioye.
Demain aurons pis qu'aujourd'hui.
Grand tas fera qui tousiours serre :
Il ne touche ny ciel ny terre.
Oignez vilain il vous poindra.
Petit hommet abat grand chesne.
Sans ligneul rien ne coust l'alesne.
Tel te veut pendre qui t'oindra.
Bran d'affaires dont n'ay que faire.
Tost se duist l'oiseau debonnaire :
Remercie Dieu qui és bien né.
Tel lon a chassé qu'on regrette :
Achepte paix et maison faite.
Tout autant porté que traisné.
Comment ie va du coq à l'asne.
A l'asne le chardon est mâne :
Auec les loups il faut huller.
Vn rongnon entouré de graisse
N'est iamais gras. Qui prend, qui laisse.
Mieux vaut s'eloigner que brusler.
Qui est malade n'est pas aise :
Qui se courrouce qu'il s'appaise :
Qui sera mort aura le tort.
Qui se trouue bien, qu'il s'y tienne.
Qui te hait, aime bien ta chienne.
Qui le gaigne c'est le plus fort.
Par douceur lon a male beste.
La raison n'entre en folle teste.
Laisse le jeu quand il est beau.
Pour mieux saulter on se recule

Qui s'approche trop pres s'y brûle :
Qui le veau taille il est bien veau.
Chanure au rotoir n'est pas fusee.
Peine d'autrui n'est rien prisee.
La belle mort d'un ieune lou.
Cheual rongneux bouchon n'endure.
Chien enragé long temps ne dure.
Fine souris a plus d'un trou.
Prou fait qui d'un fol se deliure.
Trop d'heur les plus sages enyure.
Bon nageur se noye à la fin.
Tost est deceu qui mal n'y pense.
Souvent retarde qui s'auance.
Peu fait d'acquest fin contre fin.
Vangeance vangeance vangeance
Crie et recrie à toute outrance
Sang sang pour le sang respandu.
Le temps a faict les neffles meures.
Les plus courtes sont les meilleures.
Tost la paix ou tout est perdu.
Vne Chau-souri cheut en terre.
La Belette en ses dents la serre
Qui ne pardonne à nul oiseau.
Oiseau ie ne suis (ce dit-elle),
Souri ie suis. Se disant telle,
Elle se sauue bien et beau.
Vne autre fois recheut en terre.
Le Chahuan qui fait la guerre
Aux souris, la chau-souri prend.
Souris ie ne suis (ce dit-elle)
Mais oiseau. Par telle cautelle
Le chahuan sauue la rend.

La tierce fois recheut en terre.
Le Chat la prend, qui fait la guerre
Autant aux oiseaux qu'aux souris.
La chau-souri n'a plus d'excuse,
Qui perd sa finesse et sa ruse
Entre les pattes du chat gris.
Mais en malfait ne gist qu'amende.
Grand peché grand pardon demande.
L'herbe ne croist dans le four chaud.
Petits enfans deuiennent hommes.
Les petites font les grands sommes.
A qui moins perd plus luy en chault.
Douce parole romt grande ire.
Il déchirera qui trop tire.
A l'ennemy fay pont d'argent.
En amours ha sens et folie.
Il est foul dit-on, qui s'oublie.
Tout chacun porte le changeant.
On regratte la vieille playe.
Dieu voit tout : c'est luy qui tout paye.
En grand fardeau n'a point d'aquest.
Sortons ou passons la carriere.
Marchons ou auant ou arriere.
Ce n'est ton propre ny conquest.
Fuy la meule, fuy la farine :
Qui bien le bat le fer affine :
Qui a la mousche, il a le miel.
Tard arriue qui perd sa voye.
Le chien plus couard plus abboye.
Rien ne vaut qui n'a point de fiel.
Belle chere contente l'hoste.
Qui ne veut donner ne nous oste.

L'abbatu veüt tousiours luitier.
Passe l'escot qui rien ne paye.
O grand claquedent ne nous raye
Si tu ne veux nous acquiter.
Qui du sien donne Dieu luy donne.
Qui a soif il trouue l'eau bonne.
Qui disne tout n'a que souper.
Qui veut mourir bien, que bien viue.
Qui veut durer de rien n'estriue.
Ton couteau pourroit te couper.
Bon loyer atten du bon maistre.
Qui par deux fois piqué veüt estre
Regimbe contre l'aiguillon.
Pleur qui vient avec heritage
C'est vn ris sous vn faux visage.
De bon laboureur, droit sillon.
Fortune est de verre et cassante,
Tant plus elle est resplendissante
Le danger tire du danger.
Il est fol qui pense estre sage :
Bien despenser est bon mesnage :
Tel perd ce qu'il n'ose manger.
Attendez, vous orrez merueilles.
Qui tient le loup par les oreilles :
Qui par la patte le mastin :
Qui tient l'anguile par la queüe
Il faut payer c'est chose deüe.
Nul ne peut forcer le destin.
De nul ie n'ay voulu médire.
Et ne sçauroy comment redire
Ce que i'ay dict sans y penser.
Gens de bien prenez ma defense.

Nul de vous non plus s'en offense
Que i'ay voulu vous offenser.
Ce n'est rien qu'une folle verue :
S'elle peut servir qu'elle serue,
Qui voudra s'en offensera,
Mais à nul n'ay voulu desplaire.
A tous ie ne scauroy complaire.
Moins plaira qui plus pensera.





QUATRIEME LIVRE
DES
MIMES, ENSEIGNEMENTS
ET PROVERBES
DE I. A. DE BAIF



R IEN meilleur, SIRE, ne peut estre
Qu'auoir à viure sous vn Maistre
Bon, gracieux et bienfaicteur,
Et traictable, et facile à prendre
Quelquefois le loisir d'entendre
La plainte de son seruiteur.
Or m'estant permis ne rien feindre,
En liberté ie vien me plaindre
A vous, ô mon Roy : non de vous,
Qui tousiours m'estes faorable
Et liberal et secourable
Et serein et benin et dous :

Mais ie me plain de la Fortune,
Qui ne me fut onc opportune
Pour respondre à mes beaux desirs.
Car tousiours le desauantage
Repoussant mon noble courage,
A rendu manqués mes plaisirs.
Que sert vne ame genereuse
Des vrayes vertus amoureuse
Dans vn gentil cœur decireux,
Si la santé, si la ieunesse,
Si le pouuoir, si la richesse,
Ne rendent l'homme bien heureux ?
Ce n'est qu'un objet à l'Enuie :
Ce n'est qu'une fascheuse vie,
Pleine de despits et regrets :
C'est vne ombre vaine d'un songe :
C'est vn creuecueur qui nous ronge
D'ennuis, soings et tourmens segrets.
En la pauureté la prudence
Ne peut venir en euidence :
C'est mépris : c'est obscurité.
Le plus vertueux et plus sage
Et plus sçauant, se décourage
Accablé de nécessité.
Graces à l'heureuse nature,
Dequoy songneuse elle procure
Rendre aisé ce qui fait besoin :
A la chose non necessaire,
Pour l'auoir il luy plaist de faire,
Qu'il faut de la peine et du soin.
Mais qui n'a point l'ame abbatue,
Qui de bien faire s'esuertue,

Qui sçait l'honneur et le vray bien,
Qui gouste les plaisirs louables,
Qui boust de desirs honorables,
Souffre trop de ne pouvoir rien.
O Dieu, que n'eû-ie l'ame vile?
Que ne naquî-ie mal-abile
Lourd et grossier d'entendement?
Long temps ha ma fortune faite,
l'eusse trouué quelque retraite
Pour viure à mon contentement.
Je n'aimeroy point l'accointance
Des personnages d'excellence
De beaux arts la vie honorans :
Je ne me pleusse à tenir table
A la compagnie agreable
Qui chasse les soins deuorans :
Je n'eusse gousté la Musique,
Ornement de l'art poétique,
Douce compagne de nos vers :
Je n'eusse point voulu parestre,
Ny recherché ne me veisse estre,
Pour mon renom d'hommes diuers.
Mon nom, pour nos belles merueilles,
Ne fust venu iusqu'aux oreilles
Des plus grands, dont ie suis cognu :
Loin de faueur, loin de disgrace,
Content de ma fortune basse,
Je me fusse en mon coing tenu.
Je n'eusse esté pu d'esperance :
Je n'eusse quitté l'assurance
Du peu, pour le desir de plus :
Ou Prieur à simple tonsure,

Ou Chanoine, ou dans vne Cure,
A moy ie me fusse reclus.
Là, ne sçachant que mon breuiere,
Ayant choisi telle maniere
De viure, ie vesquisse heureux :
Ie ne regretterois mon âge
Despensé contre mon courage
Parmy des gens peu valeureux.
Ie ne rougiroy point de honte,
Dequoy le peuple faisant conte
Du bruit par mes œuures acquis,
Allant par ville dans la rue,
Me monstre au doigt ou me salue,
Comme autheur d'ouurages exquis.
Vn despit desdaigneux ie n'eusse,
Ny plus auoir ie ne voulusse
Estimant loyer m'estre deu :
Enflé ie ne m'outrecuidasse :
Ingratement ie ne cuidasse
Auoir mon seruice perdu.
Voyant qui n'a pris tant de peine
Iouir de fortune certaine,
Quand i'oy que tout chacun me dict
Que deusse auoir quelque Abbaie,
Ma raison demeure esbahie
Dequoy i'en suis tant interdict.
Si ay-ie tenu de l'Eglise
La foy Catholique entreprise
Contre les nouueaux reformeurs :
Si ay-ie entrepris quelque chose
En mon temps, si dire ie l'ose,
Plus que mes compagnons rimeurs.

Si ay-ie receu les caresses
Des plus Grans, et non menteresses,
Mais pour la vraye verité.
Si ay-ie esté pensionnere
Des trois Freres, et de la Mere :
Ce fut pour l'auoir merité.
Car ie n'eus onques parentele
En Court, ny alliance telle
Qu'elle m'ait en rien auancé.
C'est ce qui plus mon fiel irrite,
Dequoy paroissant mon merite,
Si mal ie suis recompensé.
Et ce qui plus encor me mine,
Vostre assez bon vouloir encline
A me pouruoir benignement :
Et rien si tost ie ne demande
Que vostre bonté qui est grande
Ne me l'accorde prouement :
Mais quelque chose que i'obtienne,
Ne croyez SIRE que rien vienne
A mon profit tant soit il clair.
Incontinent quelque trauerse
Mon bien dedans ma main renuerse,
Qui dispaioist comme vn esclair.
Encor de memoire bien fresche
Vn malheureux desastre empesche
Ma fortune que i'arrestoy :
Tout cela qu'avec grande peine
De bons ans par vne vinteine
En vn petit bloc ie mettoy :
C'estoient deux mal-creez offices,
Qu'en payment de tous mes seruices



O qu'estre bien ouy ie peusse !
Et creu des escoutans ie fusse !
Nul toute honte ne perdroit :
Nul abusant de la ieunesse
Ne renuerseroit la noblesse,
Ny tout l'estat ne confondroit.
Qui met à mépris toute chose
Et droite et sainte, en fin lon ose
Le terrasser et mepriser :
Qui sçait le bon conseil bien prendre,
Il sçait à chacun le sien rendre :
Et doit se faire autoriser.
Quand la parole profitable
Rencontre l'oyant fauorable
En bonne et promte volonté,
En vain elle ne volle dite :
Au cœur elle demeure escrite :
Et fait le frùit de la bonté.
Toy qui sur les autres commandes,
Tu vas te perdre, si te bandes
Contre le torrent des destins.
Les mechans dessous toy n'employe,
Que tu n'encoures male ioye
Portant le forfait des malins.

Qui commande avec auantage,
Ne doit tenir autre langage
Que le langage de la loy :
Qui veut que le peuple fidele
Luy garde sa foy de bon zele,
Doit premier luy garder sa foy.
Aux bons et iustes secourable
Soit rigoureux non esbranlable
Vers ceux qui tout mal sont trenchans :
Qui aux cruels benin, pardonne
Perd tous les bons qu'il abandonne
En proye aux outrageux mechans.
Toy qui tiens souuerain empire
Souuent à par toy va redire
Trois choses pour y repenser.
Sur des hommes ie seigneurise :
Sous les statuts ie les maistrise :
Mon commandement peut cesser.
Ne commande rien que droiture :
Ne souffre brauer nulle iniure.
Qui passe vn outrage leger,
Il attrait vn plus grief outrage.
Le Roy regnant, s'il est bien sage,
Nul mal ne laisse auantager.
Impunité des maux nourrice,
Desbordement suit l'iniustice :
La conniuece attend malheur.
Du souuerain la nonchalance
Accroist la desobeissance :
De courte ioye longue douleur.
Qui vit contre toute droiture :
Qui fait débauche et fait iniure

Dessin les autres commandant,
Se rendra ses sujets rebelles,
Qui les feroit doux et fideles
Patron du deuoir se rendant.

Mais qui ferme en toute auanture
Sans changer de sa quadrature
Pour changement ne branlera ?
Qui pouruoyant à nos miseres
Autant aux hommes qu'aux affaires
Sagement s'accommodera ?

Rien n'aimera que le louable :
L'honesteté recommandable
Tiendra pour regle de ses faits.
Ses propos tendront à bien faire :
Ne sera flac ny trop austere
En ses comportemens parfaits.

Qui les honneurs aime et desire,
Sans perdre rien de son empire
Il comblera de tout honneur :
Toute ambition assouie,
Ne souffrira l'oiseuse vie,
De la vertu bon guerdonneur.

Ne donnera tel auantage
A nul qui tourne à son dommage :
De loin au mal remedira.
Sçaura le feu naissant estaindre :
Qui le lairra croistre sans craindre,
Au feu à l'eau trop tard crira.

Quelle pitié de voir vn Prince
Qui doit regir mainte prouince,
Ouir et voir tout par autruy ?
Le voir le pauuret qui se fie


A des trompeurs que Dieu maudie
Nullement fideles vers luy.
Aussi trop amy de ton aise
Ne veus ouyr rien qui desplaise.
Chacun fuit le mal te conter,
Lequel tu corrigerois d'heure :
Tandis le mal gangne et demeure :
Et plus ne se peut surmonter.
Le flateur tout en complaisance,
Ne vacant à rien d'importance,
Fuit l'honneur et l'vtilité
Du peuple et du Grand, et les flate :
Et traistre loüe (ô l'ame ingrante)
Le mal par infidelité.
Louant le mal luy qui s'en jouë,
Porte perte à celuy qu'il loüe
Par vne extreme lascheté :
Là où s'il vsoit de franchise,
Le Prince feroit entreprise
D'vn los par valeur acheté.
Mais du flateur le cœur esclaué,
Qui l'auilist et le depraue,
Le fait moisir lasche fainient,
Qui le pas ouure à toute iniure :
Et faudra qu'apres il endure
L'ayant quise à son escient.
Lors que la debauche commance,
Faut empescher qu'elle s'auance,
Et tost le chemin luy trancher :
Malice une fois enuieillie,
Comme vne longue maladie,
A peine peut on arracher.

L'homme qui dessus tous excelle
Dedans son estomach recelle
Son conseil qui va quant et luy.
Encor louange faut il rendre
A qui l'avis donné sçait prendre,
Se conseillant bien par autruy.
Mais qui fétard en tout sommeille,
Ny de soy mesme se conseille
Ny prend d'ailleurs enseignement,
N'est bon à rien, vit inutile :
Dedans sa chair son âme vile
Sert de saumure seulement.
Bien malheureux est qui peut suiure
La vraye vertu, pour y viure
Et bien-heureux et valeureux,
Toutefois s'abandonne au vice,
Et plus se plaist en la malice,
Et gaste son cœur genereux.
En lieu d'amour haine il rapporte
Des siens et des autres, en sorte
Qu'à tous son nom est odieux.
Pour louange il oit médisance :
Pour seurté s'aquiert défiance :
C'est le loyer du vicieux.
De son deuoir faire risee :
De religion mesprisee
Le manteau pour ses vains plaisirs :
Corrompre ardemment l'innocence :
Viller le consort de l'offence,
Soullé de ses sales desirs :
Negliger ses grandes afferes
Vaquer tout à choses legeres :

Sans lire, liures feuilletter :
Comter fueillets sans rien escrire :
Plorer pour rien : pour mal fait rire :
Au monde baille à caqueter.
Après le caquet vient l'audace :
Après l'audace la menace ;
Après la menace les cous.
Nous irritons l'ire Diuine,
A la veille de la ruine
Sous la foudre de son courroux.
Tel le peuple quel est le Prince.
Son autorité deuient mince.
Quand il ne fait comte de luy.
Nous en-cherrons en mal extrême :
Qui ne commande sur luy mesme,
Tres-mal commande sur autruy.
O sang Royal, doux et bons Princes,
Vous les Gouverneurs des prouinces,
Qui des grans honneurs auez part,
Officiers de la Couronne :
Iusticiers : Tous d'une ame bonne
A ces aduis ayez esgard.
Voyez de la France les larmes.
N'esmouuez les iniques armes
Pour à nos maux remedier.
La France est assez ruinee :
Tréue luy doit estre donnee :
Dieu la sçait assez chastier.
Les armes tant soient de iustice,
Ne font qu'ensemencer le vice,
Aux troubles ciuils mesmement.
Vous sçauiez les autres reprendre :

Reprenez vous. Si ferez prendre
Le chemin de l'amendement.
Ostez de vous toute auarice :
Ostez le luxe, ostez le vice :
Ostez la fausse ambition :
Ostez les débors deshonestes,
Qui nous font pires que les bestes :
Ostez mauuaise affection.
Ainsi vous appuirez l'empire :
Ne souffrirez que rien empire :
Donnez exemple de tout bien.
Autrement ie voy tout en proye,
Dequoy l'estranger aura ioye,
Non le naturel citoyen.





O Dieu, que nostre vie est bréue !
Nul toutefois ne se releue
Pour son âge bien employer.
Des animaux ont l'avantage
De viure iusqu'au dixieme âge,
Pleins de santé sans foruoyer :
L'homme nay à choses tant belles,
Foiblet, maladif, tu rapelles
Deuant qu'il connoisse qu'il vit !
L'homme meurt parauant qu'il sçache
Comme il doit viure ! Et lors qu'il tâche
Viure bien, l'ame on luy rait !
La vie est courte : et par mégarde
Du temps volant, qui si peu tarde,
La plus grande part nous perdons :
Tandis que nostre nonchalance
A rien de bon ne la dépanse.
Nostre perte nous regardons.
Sans auoir sa fuitte pensee,
Nous sentons qu'elle s'est passee :
Et ce pendant que la tenons,
Nous la prodignons en l'vsage ;
Et la rendons par grand outrage
Plus courte que ne la prenons.

Sçaches bien vser de ta vie,
Tu en auras l'ame assouie :
Assez longue la trouueras.
Comme dans la main despensiere
Grand' richesse ne dure guiere,
Ton âge tu despenseras :
Mais si peu de moyen s'adonne
Au bon ménagier il foisonne :
Nostre vie aussi, comme elle est,
Si elle estoit bien ménagée,
Croistroit de beaucoup allongee.
Nous la perdons : car il nous plect :
Et puis nous desplaist mal perdue,
Par la repentance bien deüe :
Puis qu'ainsi mal nous l'employons :
Quand l'vn moisi de poltronise
La coule en toute fetardise,
Comme les plus grans nous voyons :
L'autre l'agite miserable .
En auarice insatiable,
Plus altéré tant plus il boit :
L'autre en vn trauail inutile
Se tourmentant, fait de l'abile :
Ny iamais nul repos ne voit.
Quelcun s'adonne à gourmandise,
Et se fondant en friandise
Dans son ventre perd son auoir :
Quelque autre d'ambition vaine
De complaire au peuple se peine
Pour des premiers se faire voir.
L'vn trafiquant de terre en terre
De mer en mer, gain sur gain serre,

Par les hazars au deuant mis :
L'autre aux armes sa vie adonne.
Ne fuit trauailler sa personne
Pour trauailler ses ennemis.
Beaucoup d'ingrate seruitude
Mettent leur volontaire estude
A courtiser les grans seigneurs :
Beaucoup par enuie importune
D'autruy pourchassent la fortune,
Et de la leur sont dedaigneurs.
La plus part en ce monde viuent,
Qui rien de certain ne poursuiuent,
Vagabons en legiereté,
Irresolus d'impatience,
Demenez par leur inconstance,
Trop aimans la nouuelleté.
Des vices les espais nuages
Nos yeux troublez et nos courages
Enuelopent de toutes pars.
Descourir ne nous est loisible
Pour iuger le bon ou nuisible :
Nous suiurons nos desirs épars.
A nous nous ne pouuons nous rendre.
Si quelque repos nous vient prendre,
Comme sur la profonde mer,
(Encore que le vent y cesse)
La tourmente point ne nous laisse :
Il faut ou voguer ou ramer.
A bien peser nostre folie
La moindre part de nostre vie
Est celle part que nous viuons.
Tout le cours de nostre fresle âge

N'est pas vie, ains vn vol volage
D'vn temps que iamais nous n'auons.
Tu penses que cecy i'adresse
A ceux que tout chacun confesse
Se mal porter ou gouuerner.
Voy ceux, de qui l'heureuse vie
Chacun à les suiure conuie,
De leurs biens propres maumener.
A d'aucuns leurs richesses nuisent :
D'autres eux mesmes se seduissent,
Par ce qu'ils croyent mieux sçauoir.
Quelques vns qui veulent bien dire,
Trop bien disans vont se destruire,
Pour trop auoir fait bon deuoir.
O combien, tous haues palissent,
Qui par debauche s'elanguissent
Continuans la volupté !
O combien, entourez d'vn monde
De suiuan, où sottise abonde,
N'ont rien de franche liberté !
L'vn demande, l'autre auocasse :
L'vn se defend, l'autre pourchasse :
L'vn plaider, l'autre va iuger :
Et l'vn pour l'autre se consume :
Chacun d'eux bien faire presume :
Tous sous autruy se vont ranger.
Si vn tout seul ne se peut dire :
Et quelcun sottement s'aïre
De n'estre d'vn grand reconnu.
Pourquoy d'vn autre se va plaindre,
Celuy qui, pour ailleurs s'astraindre,
De soy nul conte n'a tenu !

Encor luy, bien que d'une face
Assez fiere et pleine d'audace,
T'a bien regardé quelque fois :
T'a bien daigné prester l'oreille.
Mais toy (qui est plus grand' merueille)
Jamais tu ne t'oïs ny te vois.
Chacun en son bien tiendra serre,
Et fust-ce pour vn doigt de terre ;
Le debattra iusques au bout :
S'il est question de sa vie,
Au premier sans qu'on luy conuie,
Aller se laissera du tout.
Nul de son argent rien ne donne :
Sa vie à chacun abandonne,
Leur patrimoine ils vont gardant :
Du temps ils ne font guiere conte :
En sont prodigues, et sans honte
Le vont pour qui que soit perdant.
Le temps toutefois est la chose
Dont plus iustement le Bon ose
Se monstrier avaricieux.
Or attaquons quelque vieil homme,
Et le prions vn peu qu'il somme
Le temps vescu de ses ans vieux.
Tu as cent ans et dauantage :
Recalcule de tout ton âge
Combien en eut ton creancier,
Combien tes sottes amourettes,
Combien tes affaires secrettes,
Combien ton pauvre tenancier,
Combien tes procès ordinaires,
Combien tes valets mercenaires,

Combien ton aller et venir :
Adiouste encor tes maladies
Mal acquises par tes folies :
Elles, si t'en peux souuenir :
Et tout cela qui sans vsage
S'en est allé pour ton dommage :
Si tout cela tu en rabas,
Te verras auoir moins d'annees
De beaucoup que ne t'as donnees :
Et que verdelet tu t'en vas.
En apres à par toy repanse
Quand tu as gardé ta constance,
Certain d'auis et resolu :
Combien de fois selon ton ême,
D'vn cours et d'vne raison même,
Et quel iour tu as reuolu.
Quand c'est que sans muer visage,
Ou que sans changer de courage,
Vn seul iour tu as sceu passer :
Combien d'œuures, par tant d'annees
De mal-empléte et mal menees
Parfaits tu peusses ramasser :
Combien de gens ta longue vie,
Comme en pillage, t'ont rauie,
Toy ne sentant que la perdois :
Combien de temps la douleur vaine,
La ioye de sottises pleine,
T'ont fait perdre à diuerses fois :
Combien tes hautes conuoitises,
Combien tes flateuses hantises,
De tout ton âge t'ont osté :
Pour le peu que vas recognoistre

Te rester et yrayment tien estre,
Tu meurs n'estant pas aousté.
Qui en est cause? Comme à mesme
D'un vif sourgeon sans moyen mesme
Le temps respandu vous iettez :
Comme mortels en défiance,
Comme immortels en assurance,
Tout vous craignéz et souhaitez.





Depuis qu'en toute vilenie
Nostre noblesse fut honnie,
Mettant sous les piés tout honneur,
Par vn malheureux et sot change,
Tous ont mesprisé la louange :
Le loueur n'a son guerdonneur.
Comme on a cessé de bien faire,
Aux Poetes a falu se taire :
Nul en besongne ne les met :
Ailleurs ont mis leur fantaisie :
La nûe et pauure Poësie
Rien que despoir ne se promet.
Ny la mesure ny la rime
Auiourd'hui n'est plus en estime :
Vulgaire, est vulgaire du tout.
Qui veut plaire, se faut desplaire :
Faut se rendre bas et vulgaire
En sens et mots de bout en bout.
Poësie est donc terrassée :
Coyonerie est auancee :
Poltronise braue les Dieux,
Valeur et prouesse abbatue :
Les releuer nul s'esuertue :
Tout bon conseil est odieux.

Princes en leur plaisanterie
Sont assistez de flaterie,
Et d'ignorance en tous estàs:
S'aucun en quoy que soit excelle
Il est moqué s'il ne le cele.
Bestise a des faueurs à tas.
Deuant eux vn sçauant et sage
Ne trouuera nul auantage,
Ne se verra iamais ouy.
S'il est accort, il s'en retire:
Ou craintif et caut ira dire
Non sur non, ouy sur ouy.
Présen bien ce que sent le Prince
Et t'y accorde. O qu'on est mince
En bons desseins et beaux projets!
Mettre sa maison en parade,
Et rompre vne lourde algarade,
Ce sont bien differens sujets.
Nostre sottise mal-abile
Rend le mal-aisé trop facile
A qui n'eust osé d'y penser.
Vne vaillante diligence
Eust aboli toute l'engence
Deuant qu'auoir sceu commencer.
Qui de nos mignons s'en remue?
Ce sont de vrais oisons en mue:
Ce n'est que fadése et qu'orgueil:
Toute autorité mal acquise
D'elle mesme tombe démise.
Et peuuent-ils bien leuer l'œil?
Vn remors de leur manigance
Vient au runge en leur conscience

Faut bien qu'ils ayent le cœur bas.
Que dirons-nous du Manifeste :
Ha! c'est vne maudite peste
De nouveaux discors et debas.
Pere Matthieu, que veux-tu faire
Avec ta Bule extraordinaire
Où sont tant de beaux traits passez ?
Où des clauses toutes nouvelles
De forfaire licences belles ?
Nous nous en dispensons assez.
Qui veut hors de tout scrupule estre
Soit ou pour esgorger son maistre
Ou le voler sans craindre rien ?
Qui peut oser commettre et faire
Au lict de son frere adultere,
Inceste avecques le sang sien ?
Qui veut piller une Prouince :
Se rebeller contre son Prince :
Faire faubond et fust-ce à Dieu :
Qui veut estre bon Sodomite :
Docteur en toute chatemite :
Qu'il en parle à Père Matthieu.
Si quelcun faisoit conscience,
Comme suiet d'obeissance,
De brasser la mort à son Roy.
Ou par poison ou par pistolle
Ou le dagant : d'ame trop molle
Craignant de lui manquer de foy :
Vers Pere Matthieu se retire.
Pere Matthieu par son beau dire
Le cœur au ventre luy mettra :
Et le dispensant à cautele

L'absoudra d'estre en rien fidele :
Et paradis luy promettra.
Ha, nous auons par grans disgraces
Fait des putains des chastes Graces :
Auons profané leur honneur.
N'auoir receu les biens ne fasche :
Tant comme s'il faut qu'on les lasche.
Don se perd d'vn mauuais donneur.
Don bien donné ioye et richesse :
Don mal donné perte et tristesse,
Tant à celuy qui l'a donné
Comme à celuy qui l'ose prendre :
Car tost ou tard il faut le rendre.
Bien et mal mourra guerdonné.
Ha Nemesis iuste equitable,
Aux hommes et Dieux redoutable,
Qui viens soudaine aux vieux pechés,
Et tardiue aux fresches offenses,
Vangences vangences vangences !
Nous en serons bien empeschez.
Le mechant le mechant chastie :
Nostre assurance est mal bastie :
Nul conseil n'assiste l'estat.
Au timon n'a nul bon pilote.
Trop mieux sieroit vne marote
Qu'vn sceptre au poing d'vn Prince fat.
Religions, ce sont des bourdes :
N us crions aux oreilles sourdes :
On ne croit pas ce que l'on voit,
Et vous croyez qu'on puisse croire
Ce qui n'est point. Voire da voire :
Preschez preschez : on vous en croit.

On voit ce que vous pouuez faire :
Il n'est plus d'homme debonnaire :
Tout est du tout abastardi.
Preudhommie n'est plus au monde.
Toute rage et sottise abonde :
Il n'est plus nul preux ny hardi.
Tous nos hommes ne sont que couilles :
Lasches gogues, flagues andouilles :
Qui ont du mou en lieu de cueur.
Si l'homme de Dieu vient parestre
Vn monde neuf il fera nestre,
S'en estant fait iuste vainqueur
Mais il ne faut se faire accroire,
Enflé de quelque vaine gloire,
D'estre celuy ne l'estant point.
Il viura de façon Royale :
Portera l'ame liberale,
Le cœur de vertu noble espoint.
Aimera les hommes sans feinte :
Ne requerra d'eux nulle crainte :
De leur amour se fera fort.
Sera le patron de bien viure :
En pieté se fera suiure :
Haira l'hypocrisie à mort.
Vrayment affranchira les ames :
Chassera tous abus infames :
Bannira superstition :
Ne forcera point les pensees.
Ostant ces bestes insensees
Raclera l'Inquisition.
Detestera la tyrannie :
Ne laissera pas impunie

La forfaiture panader.
Ne laissera non guerdonnée
La vertu choir abandonnée,
Ny les fous en mascarader.
Où est-il ce preux ce profete
Cest Heros que le bon souhete?
Où est-il cest homme de Dieu ?
Il n'est pas qui le bien restore:
Ou s'il est il se cache encore.
Garde le fouët Pere Matthieu.
Gardez le fouët faux hypocrites:
Vous aurez selon vos merites :
Vostre Euangile est découuert.
Le vostre n'est le perdurable,
Qui doit aux humains secourable
Estre pour tout iamais ouuert.
N'outrager ne rend iuste l'homme :
Ne vouloir outrager consomme
Le Iuste qui peut outrager :
Qui peut tout prendre et ne veut prendre :
Mais à chacun le sien va rendre,
Ne s'en daignant auantager.
Le Bon iamais nul mal ne pense,
Aime les bons, les mauuais tansé,
Son bon cueur, est du bon la loy.
Chez soy ne logera l'Enuie :
De nul ne troublera la vie.
Quiconque fait bien, il est Roy.
A Dieu l'accompli sacrifice
C'est vn cœur muni de iustice.
Toute vertu va s'assemblant
En cil qui, doué de nature

Franche et sans dol, Bon aura cure
D'estre vray Bon, non par semblant.
Donc si d'accord ne pouuons estre
Des secrets que Dieu fait parestre,
A qui moins les peut regarder,
Laisant les Docteurs en-debatre,
Sans pour cela nous entebatre,
Viuous d'accord de nous garder.





IE n'entan point la Ligue sainte :
Mais ie ne puis n'en auoir creinte.
Car bien souuent la sainteté
Cache l'impieté couuerte :
Bien souuent la Iustice ouuerte
Enclost la grand' mechanceté.
Ie ne fu iamais heretique :
Ie suis Chrestien Catholique,
Et i'aprouue la Papauté:
Mais i'aborre la tyrannie :
Et fui la rebelle manie
Qui romt la iuste Roiauté.
La Roiauté iuste i'apelle,
Qui de race continuelle
Dure estable au sang François,
Sans rechercher son origine,
Puis que par la grace Diuine
Ils regnent receus d'une voix.
O Papauté donne toy garde
Que le feu iustement ne t'ard ,
Que tu commences d'alumer :
Tant que de Paix tu fus nourrice,

Dieu t'a esté doux et propice :
Dieu t'a faict sur tout estimer.
Mais tu n'émeus iamais la guerre
Entre les Princes de la terre
Que tu n'ais couru grand hazard.
Pense à l'auis que ie te iette
Ni Deuin ni fils de Proféte :
A quoy ne faut auoir égard.
Ne cuide extirper l'heresie
Ni par boufante hypocrisie
Ni par le glaive des puissans.
Ce sera la vie exemplaire
Qui remettra le populaire
Hors de l'erreur en son bon sans.
Prelas déchassez l'auarice,
La delicatesse et le vice
De feinte superstition :
Embrassez la pieté vraie,
Et vous arracherez l'yuraie
De la sainte religion.
Faites que de Dieu la parole,
Son glaive fort, trenchante vole
Par toute la Chrestienté :
En toute langue en toute guise
Par toute nation aprise
Le nom du vrai Dieu soit chanté.
Christ et la cour celestielle
En mainte musique nouvelle
Voie ses honneurs retentir :
Lors nous verrons dedans nos temples,
Qui ne seront plus assez amples
Les foruoiez se repentir.

Dieu n'a-t'il de parole expresse,
Non couuerte, non menteresse,
Dit (à quoy ne faut répliquer :)
Mon regne n'est pas de ce monde.
De ce mot grand sauoir redonde :
Ce n'est à moy de l'expliquer.
L'entande à qui Dieu fait la grace
De l'entandre, car moy ie passe
Plus outre pour vous publier,
Qu'en paix de quatre ans de duree
L'Eglise s'est plus rassuree
Qu'en vingt ans à tout guerrier.
La Guerre par haines ciuiles
Deserte vilages et viles :
Dépraué les cueurs des mortels :
Etablist meurtre et brigandage :
Nourrist d'impieté la rage :
Profane les sacrez autels.
Toute reuerance terrasse,
Hausse l'impudence et l'audace,
Abat l'honneur que Dieu requiert :
Les Bons perte de tout endurent :
Les forfêteurs brauent et durent :
Iustice perd, outrage aquiert.
Par la guerre les bons empirent :
Les pires tout à eux atirent,
L'aise la richesse et l'honneur :
Les blasphemés et violences
Ont cours et toutes insolences :
Vertu n'a point de guerdonneur.
Pour bien ne faut la guerre faire,
Qui est de trop douteuse affaire,

Courses estudes et labeurs,
Y compris tous les arerages
Et de pension et de gages,
Deux offices de Receueurs,
Et de creation nouvelle,
Et de deffaitte Dieu sçait queile,
Où nul ne vouloit financer,
A Castres, bien loin de la France,
Païs de vostre obeissance,
Sur lesquels m'auiez faict dresser.
Vn an et demy ie les garde :
Et tout ce temps me poise et tarde
Qu'il ne venoit quelque marchand :
A la fin quelcun se presente
Faisant offre qui me contente :
Ie l'accepte, m'en dépeschant.
L'argent m'est compté, bon, d'espreuue,
Sous tel si, qu'autre ne se treuue
Qui pourueu de vous soit receu :
Le lendemain voicy mon homme :
De rendre son argent me somme,
Qui se trouue avec moy deceu.
Vn fascheux Tapi Secrétaire,
Par vne voye extraordinaire,
Dauant s'estoit faict receuoir
Sans quittance d'aucun des vostres,
M'apprestant par ne sçay quels autres
Ce pasté pour me deceuoir.
Ainsi voicy la belle glace
De mon espoir par vn disgrace,
Qui vient se fondre entre mes doys.
Et si vostre autorité SIRE

N'entreuient, ie ne sçay que dire :
Ie pêr et le sens et la voix.
Ie ne sçache qu'vn seul remede :
C'est vostre faueur, c'est vostre aide.
Car ie n'espere que de vous :
Autre que vous ie ne veu suiure
Ny seruir. A vous ie veu viure,
Prince bon liberal et dous.
Vsant donc de vostre puissance
Et plus grande munificence,
Donnez commandement expres
Au gentil sieur de Vuideuille
Me faire rembourser habile,
Sans me faire courir apres.
Si benin pour moy tant vous fêtes,
Non seulement mon Roy vous estes,
Mais Dieu sur terre me serez,
Bien-faicteur, sauueur de ma vie,
A vous pour iamais asseruie,
Puis que vous la conseruerez.





Droite Raison tu es perdue,
Passion en ton lieu se rue :
Tu es le fer fait à tous piés,
Chacun à ce qu'il veut te range :
Mal que lon veut n'est pas estrange,
Lon te force à nos mauuaistiés.
Dieu nous fit vne ame si belle,
Iesu Christ nous donna par elle
Nous faire de Dieu les enfans.
Les enfans de Dieu sont-ce diables ?
Que nous allons plus execrables
En forfaitures trionfans !
Droite Raison tu n'es plus droite,
Pour toy forcenaion exp'oitte
Sur les humains toute fureur.
Droite Raison, si ie te porte
C'est en vain, le torrent m'emporte
Auecque la commune erreur.
Droite Raison tu me conseilles
Suiure l'essein de nos abeilles,
Qui va sa ruche abandonner,
Des petits oisillons la proye
Qui deça qui dela déroye,
Et Dieu seul les peut rabiener.

Plus vaut auiourdhuy la mensonge
Que la verité. C'est vn songe
Le vray parlant de faussetez,
Qui courent pour veritez vrayes :
Lon cherit auiourdhuy les bayes
Appasts de nos mechancetez.

O si vne raison commune,
Non peruerse, ains à tous coustume,
Conduisoit nostre genre humain :
Nous serions vne bergerie
Sous vn berger, et la furie
Ne nous chasseroit de sa main.

Vangences de Dieu sur nos fautes,
Dont les cataractes trop hautes
Viennent sur nous se débonder.
Repensons à nos forfaitures,
Repurgeons-nous de nos ordures
Et songeons à nous amender.

Tu nous as perdus fetardise,
Abominable paillardise,
Luxe en tous debors dereglé !
Insupportable tyranie,
Vne commune en tous manie
Vn desir en tout aueuglé.

Vne amour folle de soy mesme,
Vne auarice en tout extrême,
Maudite superstition :
Vne maline hypocrisie,
Vne idolatre fantaisie,
Quittant la bonne affection.

Poisons mortelles et vilaines
Gastent nos puits et nos fontaines :

Et nos bergers, qui nous ont pu
D'herbes de venimeux vsages
En lieu de nourrissans herbages.
Ont fait tout le pis qu'ils ont peu.
Dieu nous aduertit par la peste,
La famine gaste le reste,
La guerre deserte les champs,
Pour cela nul ne veut combattre :
Dieu a beau nous battre et rebattre,
Nous en deuenons plus mechans





Vn Soleil qui des cieux rayonne
Fait ça bas toute chose bonne :
Et s'il n'y rayonnoit des cieux
Rien beau ny bon n'y verrions estre
Car sans son rayon ne peut croistre
Arbre ny beste en ces bas lieux.
Mais si deux Soleils venoient prendre
L'empire des astres pour rendre
Par ce grand vague leur clerté,
En grand danger d'une ruine
Seroit le monde en sa machine,
Par vn brulement deserté.
Vn Soleil est tressalutaire :
Deux Soleils ne pourroient bien faire :
Car toutes choses bruleroient.
Au monde un Soleil seul doit luire.
Vn Roy seul conserue vn empire :
Mais deux Rois le desoleroient.
Dieu met sur tout sa pouruoyance.
Destin est sa forte puissance :
Fortune y requiert auoir part :
En son ordre va la Nature.
Pour receuoir toute auanture
Beaucoup vaut la raison et l'art.

Si Dieu a soin de mon affaire
D'en auoir soin qu'ay-ie que faire?
Car Dieu tousiours le soignera,
Soit ou que le soin ie m'en donne,
Ou que le soin i'en abandonne.
Mais aide toy, Dieu t'aidera.
Que fait Dieu? les hauts il abaisse,
Hausse les bas : les tortus dresse,
Et les droits il va tortuant.
Ne conuoitons rien d'impossible :
Ne cherchons de voir l'inuisible :
Rien de vain n'allons remuant.
Pense tousiours que tu es homme :
Se cognoistre tout bien consume :
Complais à tous non à toy seul.
Ieune, voy venir ta vieillesse :
Vieil, souuien toy de ta ieunesse,
Modere et la ioye et le deul.
Nul de l'auenir ne s'asseure :
Le present iamais ne demeure :
Le passé ne nous est plus rien.
O Dieu qui souuerain commandes,
Ne nous donne pas nos demandes.
Mais ce qui doit nous estre bien.
Réueille toy Roy debonnaire :
Sois à tes sujets l'exemplaire,
Bon pour au bien les conuier.
Tes vrais loyaux François employe.
Il n'est celuy d'eux qui n'ait ioye
En si bon œuure s'employer.
Pour conduire emprises tant bonnes,
Tu fineras et des personnes

Et des conseils et des moyens.
Le plus fort seras en iustice
Pour escarter le vilain vice
Qui peruertist nos citoyens.
Bonnes mœurs font l'heureuse vie :
La bonté de honte est suiuite :
Bons sont aisez à decevoir.
L'art acquiert de la cognoissance :
Bonnes mœurs de la bien-voullance
Et des amis nous font auoir.
Le bon aura l'ame constante :
Ou soit que le bien se presente,
Ou soit que le mal l'entourast.
Si Dieu donne de la richesse
Au peruers qui n'a point d'adresse,
Il n'en vse ou en fait degast.
L'homme de bien est salulaire.
L'homme nay libre veut bien faire :
Le seruil n'aime à faire bien.
En bonté beaucoup vaut prudence.
Prudence en malice est nuisance.
Sans bonté bon sens ne vaut rien.
Où l'impudence tient l'empire,
La honte de là se retire.
Honte honteuse y moisira.
Tout vieillist icy où nous sommes :
Mais plus auant iront les hommes,
Plus l'impudence y ieunira.
Il faut des plus sçauans apprendre :
Ayant appris prudent se rendre.
L'homme prudent ne parle en vain.
Aux fous qui ne s'en font que rire

Les bons auis ne faut pas dire.
Sain propos touche vn esprit sain.
Rien n'est qui ait plus de puissance
Qu'vne bien sage bien disance.
La parole esteint le courroux :
Par la mielleuse parole
L'ame desolee se console,
Et le plus aigre se rend dous.
La seule parole manie
Des humains la totale vie.
Cœurs sont de parole touchez.
La parole asseche les larmes :
La parole échauffe les armes :
La parole fait tous marchez.
Sagesse au parler se consomme.
On cognoist le carat de l'homme
A la touche de son parler.
La parole vn coup eschapee
Ne sçait plus estre ratrapee,
Mais volle où elle doit aller.
Bon fait tenir ses léures closes.
A bien peser ce sont deux choses
Parler beaucoup ou à propos.
Parole hors de saison dite,
D'vn grand heur par cheute subite
Souuent renuerse le repos.
A ta langue sur tout commande.
Sot parler dommage demande.
Qui se taist vainc le violant.
Mieux vaut beaucoup taire que dire.
Taisant nulle perte on attire :
Grand mal on attire en parlant.

Quand à tout ce qu'auras à fair :
Assigneras l'heure ordinaire
Departant sa propre saison,
Donne au silence en ta iournee
Sa propre saison ordonnee :
Et le feras avec raison.
Et ieune et vieil par le silence
Acquiert honneur sans repentanc :.
On dit beaucoup en peu de mots.
La langue marchant de mesure,
Qui rien ne iette à l'auanture,
A grande grace en ses propos.
A Dieu par sus tout reuerance :
Après aux Rois obeissance.
Tout ce qui est cede au plus fort :
L'hyuer negeux couuert de glace
A l'esté fructueux fait place,
Au doux Zephyr des vents l'effort.
La nuict d'estoiles couronnee
Fuit deuant la claire iournee :
Le long trauail cede au sommeil :
Le fort sommeil qui tout maistrise
Au beau resueil lasche sa prise,
Chassant les tenebres de l'œil.
O que c'est vne grand'folie
De s'amuser toute sa vie
A ce vain curieux sçauoir,
Qui faisant oublier sa terre
Fait les badins humains enquerre
Des choses qu'on ne peut auoir.
Qui cependant que l'œil il hausse
Se laisse choir dans vne fosse,

Il luy mesauient à bon droit.
Ce qu'il fou'e aux pieds il ignore :
Et ne le sçachant pas encore
Les cieux escheler il voudroit.
Dieu est Dieu : ainsi le faut croire :
Mais c'est vne indiscrete gloire
S'enquerir quoy, comment il est.
S'on le fait, on reuoque en doute
S'il est ou non. Qui là se boute,
Son maudit propos ne me plaist.
Dieu est trop malaisé d'entendre.
Il n'est possible le comprendre
Luy qui n'est corps avec le corps,
Luy parfait, par chose imparfaite,
Luy eternel, par chose faite
Pour peu durer en ses efforts.
Dieu est à iamais : l'homme passe.
Dieu est verité d'efficace,
L'homme imaginant ombrageux.
L'homme voit bien les corps visibles :
Choses visibles sont dicibles.
Par dela l'homme est outrageux.
Car Dieu qui n'a ny corporence
Ny figure ny apparence
Ny matiere en laquelle il soit,
En nos sens est incomprenable :
Dieu donques est Dieu l'ineffab'e,
Dieu que nul mortel ne conçoit.
Croyons donques sans deffiance
Dieu le vray Dieu : car sans creance
Dieu nous ne pouons adorer.
Hors de foy toutes entreprises

De nos recherches plus exquisés
Nous font l'apprenant l'ignorer.
Moins en sçait qui plus en presume.
Faisons vne bonne coustume
Aux mœurs qui nous touchent vraiment.
Aux choses qui point ne nous touchent,
Ou desquelles nos sens n'approuchent,
Ne nous amusons vainement.



Et ne finist pas où lon veut.
La commençant bien lon propose:
Mais en auient toute autre chose.
Plus que raison fortune y peut.
Par desseins aucuns s'auantagent :
Entre eux les prouinces partagent:
Chez eux pensent loger la paix,
Et détourner bien loin la guerre,
Qui retumbera sur leur terre :
Eux mourront perdus et défais.
Qui bouillant de quelque bon zèle
Encontre l'Eglise nouvelle,
La ruiner se promettra,
Garde de renuerser la siene.
Possible auecque l'anciene
Son estat en proie mettra.
O Noble sang plein de vaillance,
Aimez nourrissons de la France,
Est-il vrai ce qui bruit de vous?
Je ne puis ni ne veu le croire,
Que le desir de vaine gloire,
Que la vengeance et le courroux :
Que l'importune et caute instance
Faite contre vostre constance
Par des ennemis du repos,
Puissent tant sur votre ame outree,
Qu'y soit la felonie entree
Ebranlant votre bon propos?
Bon propos, qui mét son étude
A chasser toute ingratitude,
A maintenir fidelité,
A soutenir notre Couronne,

Garder la Roiale personne
Des assauts de l'hostilité?
Tu armes donc contre son Prince
Et ses sujets et sa prouince,
Dont il t'auoit fait gouuerneur?
Fraudes-tu du depost la garde?
Ie ne le croi pas : Dieu m'en garde.
Où seroit de la Foy l'honneur?
Voudrois-tu bien, toy que lon prise,
La reputation aquise
Par tant de temps et si beaus faits,
La perdre en vne maudite heure
Par vne entreprise mal s'ure
D'où germeroient tant de forfaits?
La pierre ainsi iadis ietée
Parmi la semaille auortee
Naissante des dents du dragon,
Engendroit la ciuile guerre
Qui rendoit à sa mere terre
Aussi tost son peuple felon.
O Terre tu es trop chargee,
Tu seras bien tost soulagee
De tant qui marchent sur ton dos.
La débauche sera punie
De l'insolente tyrannie
Qui abusoit du doux repos.
Dieu de biens nous donne abondance :
La bonne annee en euidance
Promét tout à grande foison,
Planté de vins et de blairie :
Mais las notre forsenerie
Nous banist de notre maison :

Et n'en iouyrons miserables :
Car les insensez execrables
Par fureur le gast en feront.
Dieu chatîra leur fole rage :
Sur eux recherra leur outrage :
Etrangers en trionferont.
Faut-il, (douce et bonne Patrie,
Où toute gent viuoit chérie,
Où florissoient tant des beaux arts,
Où tout bien et plaisir abonde)
Qu'un peuple barbare t'inonde,
Te depeuplant de toutes parts ?
O qui aueuglez de vangence,
Ou d'outrageuse confiance,
Ou d'un faux desir deceuant
Affectez puissance mal seure,
Rauisez retirez-vous d'heure :
Au mal ne passez plus auant.
Oubliez nos iniures vaines :
Tost mettez bas vos males-haines,
O vous les Grans qui tant pouuez.
Que l'étranger chez lui se tiene,
Le François en la terre siene :
Et vos ruines n'emouuez.
Car vos ruines ie voy prestes
A choir pour acabler vos testes,
Si ne moderez vos fureurs.
Allez montrer votre vaillance
Ailleurs dehors de notre France,
Et là trionfez conquereurs.
D'ici n'emporterez que perte
Votre gloire y sera couuerte :

Toute haine sur vous courra :
Auecque la mort de votre âme,
Pour vous et les votres vn blâme
A tous les siecles demourra.





NICOLAS, qui par long vsage
T'es rendu bon, sçauant et sage
Pour viure l'vn des plus contens :
Par esbat, s'il t'en prend enuie,
Voy tout le decours de ma vie
Jusqu'à l'age de quarante ans.
Plus auant tu verrois le reste,
Si, des esprits la mort, et peste,
Feneantise ne regnoit :
Qui vertus et lettres mesprise
Et l'hypocrisie autorise,
Que le regne heureux dedegnoit.
Nous sommes fondez sur la mine.
Nul le droit chemin ne chemine.
Bons poètes sont à mespris.
Depuis que par vn maudit change
Lon hait les actes de louange,
La louange n'a plus de pris.

* * *

Le reste de ce Mime est esgaré.



AUTRES MIMES

ET ENSEIGNEMENTS

I

Au Dieu qui ne meurt point et qui est sans naissance,
Dieu tout bon, tout puissant, qui de sa seule voix
F'açonna l'Univers, paye selon les loix
L'honneur qui luy est deu : Adore sa puissance.

II

Ton serment soit entier, maintien l'inuiolable,
Des sceptres esleuez reuere la grandeur.
Au Prince, au Magistrat defere leur honneur
Et rends aux vertueux vn respect venerable.

III

Fay aussi le deuoir d'honorer pere et mere :
De tes proches parens respecte l'amitié :
Pour vn petit forfait ne porte inimitié
A quelque tien amy, et domte ta colere.

III

Supporte de l'amy autant qu'il t'est possible,
Veu qu'à ce pouuoir là se ioint necessité.
Sois doux en ton parler. Et à l'vtilité
S'adresse ton labeur : vain labeur est nuisible.

V

Dresse tes mœurs ainsi : A vaincre t'estudie
Le ventre en premier lieu : puis le morne sommeil :
La sale volupté : et d'un effort pareil
Les autres appetits. Surmonte aussi l'enuie.

VI

Soit que tu sois tout seul, ou bien en compagnie
Ne fay rien de vilain : Que mesme ton penser
Soit honneste : et tousiours essaye à te dresser
Au respect de toy-mesme. Acheue ainsi ta vie.

VII

Au faire, comme au dire exerce la iustice,
Accoustumant tes mœurs à suivre la raison :
Car la mort doit tomber vn iour sur ta maison
Et Dieu puissant vangeur punira l'iniustice.

VIII

Si quelquefois aduient que d'une main contraire
Fortune ait retiré ses biens que tu tenois :
Et si des maux communs quelque part tu reçois,
A bien patienter consiste la victoire.

IX

Employe toutefois vne viue prudence
A preuenir le mal autant que tu pourras :
Car ainsi de ses traits moins atteint tu seras.
Le sage scait chasser du malheur la nuisance.

X

Ne te laisse emporter au bruit d'une commune
Soit que d'un bon propos elle honore ton nom :
Soit qu'elle aille souillant ton illustre renom,
N'en reçois en ton cœur quelque aigreur importune.

XI

D'vn œuvre, ou d'vn parler la mignarde apparence
Ne te face abuser en faisant ou disant
Chose qui n'est seante, ains tousiours aduisant
Appuyé de conseils tes faits et de constance.

XII

Ne sois precipitant, ce n'est le faict du sage
De n'auoir poinct pensé à ce qu'il faict ou dit,
Mais bien vise à cela que repentir ne suit,
Ainsi tu passeras heureusement ton âge.

XIII

Ne mesprise aussi point la santé corporelle,
Mais en tout mesuré par vn certain compas
Regle bien ton labour, ton boire, et tes repas :
A ne s'offenser point la mesure est tres-belle.

XIII

Que ton viure soit pur et non reprehensible.
Et la iuste valeur de ton bien mesurant
Despen non par excès, liberal, et fuyant
Le deshonneste nom d'auare contemptible.

XV

Car si mal aduisé tu cherches plus paroistre
Que tu n'as en effect, et prodigues tes biens :
Tu te fais enuier appauurissant les tiens.
Mesure fait partout le sage recognoistre.

XVI

Sans y auoir pensé ton œuvre ne commence,
Et de tes yeux au soir le sommeil ne reçois,
Que n'aye chacun iour medité par trois fois
Tes faicts de tout le iour pour dresser ta prudence.

XVII

Quay-ie fait, qu'ay-ie dit, quelle a esté ma voye.
Qu'ay-ie obmis du deuoir par ordre racontant :
Si que d'auoir bien fait ton esprit soit content,
Et du iuste sentier iamais ne te foruoye.

XVIII

De la belle vertu c'est la voye tres-seure,
Et du ciel que tu vois en ses sages aduis.
Certes par cettuy-là qui en nostre ame a mis
L'admirable quattrin source de la nature.

XIX

Deuant que commencer à faire quelque chose
Prie Dieu de la faire : et le tout acheué
Dy que c'est de Dieu seul, et n'en sois esleué
D'vn vent ambitieux ; car de tout Dieu dispose.

XX

Mais recognois aussi l'estroite conuenance
Entre Dieu immortel, et les hommes morte's,
Dont tu vois dependans tous les humains conseils
Pourquoy dois inuoquer la diuine assistance.

XXI

La Nature tousiours à soy mesme ressemble ;
Ne va donc recherchant chose qu'elle ne peut,
Mais borne ton desir, car ce que Dieu ne veut,
Et ce qu'elle ne peut d'un pied marchent ensemble.

XXII

Tu en verras plusieurs sans esprit, miserables
A leur propre malheur qui d'eux mesmes courants
Ne voyent pas le bien deuant eux ignorants,
Aueugles, abbrutis, du bonheur incapables.

XXIII

Enveloppez du mal ne s'en peuvent desfaire,
Leur esprit s'en offense, et cylindres rouleurs
D'vn mal passent à l'autre avec mille douleurs,
Discord ils ont au cœur de repos aduersaire.

XXIV

O Dieu que ne fais-tu aux hommes bien entendre
Leur misere ! ou pourquoy ne viuent ils exempts
De tant et tant de maux ! sur le cours de leurs ans
Fay leur gouster ta grace, et ta iustice apprendre.

XXV

Lors ils seront heureux affranchis de leurs peines,
Plus adroits retiendront le cours de leurs malheurs,
Plus sages tariront les ruisseaux de leurs pleurs,
Moissonnants les doux fruicts des ioyes plus certaines.

XXVI

Fay donc que la raison au plus haut establee
Maistresse de tes sens bride leurs appetits :
C'est par ce seul moyen qu'ils sont assubietis,
La raison est tousiours de prudence suiue.

XXVII

Mais assure ton cœur, n'es-tu pas de la race
Des Dieux, et n'es-tu pas du ciel icy venu ?
Tu n'es que pour vn peu en ce corps retenu
Et le ciel te soustient du secours de la grace.

XXVIII

Ainsi ayant laissé ceste chair corruptible
Quand plus haut esleué tu seras dans les cieux :
Lors à plein tu boiras le dous nectar des Dieux
Et seras immortel, diuin, incorruptible.



NOTES

TOME I

- Page 5, ligne 24. — *Montre*, spécimen.
P. 7, vers 10. — *Potieux*, difficile à satisfaire.
— 13, v. 4. — *Barat*, tromperie; de là vient notre mot baraterie.
— 15, v. 16. — *Fétardise* ou *faitardise*, fainéantise.
— 16, v. 4. — *S'avoyer*, s'acheminer.
— 18, v. 18. — *Duit*, du verbe *duire*, convenir.
— 20, v. 20. — *Rengreger*, empirer.
— 22, v. 31. — *Fortemps*, gros temps.
— 24, v. 15. — Le texte paraît altéré; il semble qu'au lieu de *à l'aflac* il faille lire *à la flac* (flaque). C'est la même idée qu'exprime différemment l'ancien proverbe français : « L'abbatu veut tousjours luicter. »
— 25, v. 16. — *Cil*, celui.
— 26, v. 2. — *Poison* était alors féminin.
— 26, v. 7. — *Chastoy*, châtiment.
— 27, v. 32. — *Tigneux*, teigneux; *pigne*, peigne.

- P. 28, v. 22. — *Mauvestu*, mal vêtu.
- 29, v. 23. — *Maupiteux*, impitoyable.
- 31, v. 18. — *Ost*, armée.
- 34, v. 21. — *Gaete*, guet.
- 36, v. 18. — *Doute*, redoute. Tout ce passage est imité d'Horace.
- 38, v. 10. — *Traison*, trahison.
- 39, v. 12. — *Méchance*, méchanceté.
- 39, v. 31. — Le genre de *art* n'était pas encore fixé au seizième siècle.
- 39, v. 32. — *Manques*, privées.
- 40, v. 27. — *Comète* était alors redevenu du masculin.
- 40, v. 28. — *Soufrete*, disette, pauvreté.
- 41, v. 12. — *Chalans*, participe présent du verbe chaloir.
- 42, v. 20. — *Mousse*, émousse.
- 43, v. 27. — *Chéaux*, les petits d'un animal.
- 44, v. 19. — *Donroit*, donnerait.
- 45, v. 6. — *Peautre*, gouvernail.
- 47, v. 5. — *Maufette*, mal faite.
- 47, v. 9. — *S'écache*, s'écrase.
- 47, v. 11. — *Viande*, paît, terme de vénerie.
- 47, v. 16. — *Avale*, descend.
- 47, v. 32. — *Tistre*, tisser.
- 48, v. 9. — *Emorche*, amorce.
- 48, v. 20. — *Pelisse*, dépouille.
- 48, v. 26. — *Fein*, foin.
- 51, v. 20. — *Campane*, clochette.
- 52, v. 26. — *Frisque*, gentil, galant.
- 53, v. 4. — *Condemnade*, jeu de cartes qui demande trois joueurs.

- P. 56, v. 29. — *Se deut*, se plaint, du verbe douloir.
— 57, v. 20. — *Bobance*, pour bombance.
— 58, v. 28. — *Se hetter*, se flatter.
— 59, v. 19. — *Naufs*, navires.
— 60, v. 28. — *Avolé*, étranger, intrus.
— 62, v. 29. — *Colinhou*, nom qu'on donne à un mauvais vin fait en Normandie.
— 63, v. 5. — *Fripe*, fait bonne chère.
— 64, v. 17. — *Pardoint*, pardonne.
— 64, v. 25. — *Noizilles*, noisettes.
— 64, v. 26. — *Mereaux*, petits cailloux.
— 65, v. 1. — *Bobeaux*, petites babioles.
— 66, v. 17. — *Luy loise*, qu'il lui soit permis.
— 66, v. 20. — *Doint*, donne.
— 66, v. 8. — *Caut*, rusé.
— 67, v. 15. — *Macter*, immoler, *mactare*.
— 68, v. 27. — *Nice*, simple.
— 69, v. 1. — *Asteure*, à cette heure.
— 74, v. 21. — *Morse*, mordue.
— 76, v. 9. — *Tregne*, araignée; *ré*, rets.
— 78, v. 29. — *Sutil* était alors la prononciation de subtil.
— 83, v. 27. — *Se auist*, s'instruit, se dresse.
— 84, v. 26. — *Targe*, bouclier.
— 86, v. 25. — *Erignée*, araignée.
— 88, v. 13. — *Querre*, querir.
— 88, v. 21. — *Isnele*, prompte, agile.
— 91, v. 31. — *Delivre*, affranchi.
— 92, v. 15. — *Loise*, c'est le verbe latin *licet*.
— 92, v. 24. — *S'émoier*, se mettre en émoi.
— 93, v. 31. — *Niele*, maladie du blé.
— 94, v. 9. — *Peautre*, gouvernail.

- P. 95, v. 18. — *Qui se s'en*, faute d'impression ; lisez :
Qui se sent.
- 96, v. 31. — *Cent-testière*, à cent têtes.
- 99, v. 28. — *Mire*, chirurgien.
- 100, v. 21. — *Megnie* ou *maignie*, maison, au sens propre et au sens figuré.
- 100, v. 26. — *Pestellent*, piétinent.
- 105, v. 12. — *Le hant*, la recherche.
- 107, v. 23. — *Féres*, bêtes féroces.
- 114, v. 6. — *Dehête*, avec le même sens que le simple, flatte.
- 115, v. 24. — *Houer*, bêcher.
- 116, v. 17. — *De trop s'aherdre*, de trop s'y appliquer.

TOME II

- 125, v. 27. — *Godale*, boisson grossière.
- 127, v. 24. — *Meprison*, injustice, mépris.
- 135, v. 4. — *Debellera*, combattra, du verbe débeller, en latin *debellare*.
- 138, v. 25. — *Traire*, tirer.
- 139, v. 16. — *Prouvoir*, pourvoir.
- 140, v. 24. — *Se hette*, se complaît.
- 140, v. 26. — *Etelon*, estelon ou estalon, arbuste que l'on plante en terre et sur lequel on dispose le filet.
- 145, v. 1. — *Arte*, ver ; c'est-à-dire : corruption partout.
- 147, v. 2. — *Calant*, le modérant.
- 151, v. 1. — *Houpegay*, exclamation signifiant : c'est fait, c'est l'affaire d'un tour de main.

- P. 153, v. 22. — *Ohi*, malheur, défaut, point vulnérable.
- 157, v. 12. — *Fetardises*, lâchetés.
- 158, v. 3. — *Sins*, seings.
- 159, v. 17. — *Ains que*, avant que.
- 159, v. 32. — *Luite*, de luicter, lutter.
- 162, v. 12. — *Prou*, beaucoup. L'expression : ni peu ni prou est encore usitée.
- 162, v. 19. — *Forfère*, commettre un forfait.
- 164, v. 3. — *Soufréte*, la pauvreté.
- 164, v. 4. — *Ne s'oufre*, pour ne s'offre.
- 167, v. 3. — *Parsonier*, participant. — *S'aloue*, se vante, se loue d'être.
- 172, v. 3. — *Chapeau*, couronne, récompense.
- 172, v. 19. — *Sin*, seing, au sens de signe.
- 173, v. 8. — *Hongne*, grogne.
- 177, v. 2. — *Saycs*, habits, robes de laine.
- 177, v. 3. — *Recueût*, forme ancienne de la troisième personne du singulier de l'indicatif présent de recueillir.
- 181, v. 27. — *Rebourse*, revêche.
- 182, v. 10. — *Fine*, finit, du verbe finer.
- 183, v. 19. — *Mercerie*, marchandise.
- 183, v. 31. — *Remord*, blâme, critique.
- 185, v. 18. — *Moyenner*, faire en sorte.
- 187. — Dans toutes les éditions anciennes, les diverses parties qui composent ce chapitre ont été interverties, très certainement par l'imprimeur, qui aura, par inadvertance, modifié l'ordre des feuillets. Voici l'ordre dans lequel il faut ranger et lire les pages des éditions anciennes : f. 113 recto, f. 114 recto, f. 114 verso


- (Cheverny...), f. 113 *verso* (Solon...), f. 116 *recto* (De tes voisins...), f. 116 *verso* (Tel comme...), f. 115 *recto* (Bias...), f. 115 *verso* (En parole...), f. 117.
- P. 188, v. 27. — *Voise*, aille, du verbe voiser. Aujourd'hui le présent seul, je vais, s'est conservé.
- 189, v. 15. — *S'ottroye*, s'octroie.
- 191, v. 14. — *Hargne*, querelle, d'où hargneux.
- 193, v. 7. — *Befferie*, moquerie, du verbe beffer, qui est devenu bafouer.
- 193, v. 15. — *Affiert*, convient.
- 195, v. 10. — *Desrois*, désastres.
- 196, v. 1. — *Caroles*, danses.
- 200, v. 3. — *Celle*, cette.
- 201, v. 23. — *Mors*, mordu.
- 202, v. 2. — *Saffrette*, mignonne, agréable.
- 203, v. 8. — *Asteure*, à cette heure, prononciation populaire.
- 205, v. 13. — *Hay*, cri pour exciter les chiens.
- 205, v. 14. — *Escourre*, aller et venir.
- 205, v. 18. — *Retivons*, restivons, résistons.
- 205, v. 21. — *Parpié*, trace, passage?
- 206, v. 24. — *Sacres*, oiseaux de fauconnerie. — *Allebrenez*, chassés.
- 207, v. 4. — *Gorins*, petits porcs.
- 207, v. 13. — *Amors*, amorcé, attaché.
- 207, v. 17. — *Queux*, pierre à aiguiser.
- 207, v. 22. — *Etoré*, estoré, approvisionné.
- 208, v. 21. — *Reverdie*, joie.
- 208, v. 22. — *Vilenaille*, comme valetaille.
- 210, v. 15. — *Voisent*, aillent.

- P. 211, v. 29. — *Rait*, du verbe raire, rase, tond.
— 214, v. 10. — *Courgée*, sangle.
— 216, v. 31. — *Runje*, épieu?
— 217, v. 6. — *Pelissent*, pèlent, dépouillent.
— 218, v. 12. — *Plège*, caution.
— 219, v. 2. — *Hûle*, hurle. C'est la forme primitive.
— 219, v. 4. — *Reboursent*, rebroussent.
— 219, v. 8. — *Bezaguës*, haches à deux tranchants.
— 220, v. 7. — *Blanque*, péril.
— 221, v. 9. — *Ligneul*, fil.
— 222, v. 3. — *Rotoir*, endroit où l'on met rouir le chanvre. Quand il est au rotoir, il n'est pas encore fusée.
— 224, v. 9. — *N'estrive*, ne dispute.
— 227, v. 18. — *Segrets*, selon la prononciation du seizième siècle.
— 228, v. 29. — *Pu*, participe passé de paître.
— 232, v. 23. — *Déroye*, dévie, s'égare.
— 232, v. 24. — *Rabiener*, rétablir, remettre en bon état.
— 235, v. 1. — *Pu*, du verbe paître.
— 237, v. 31. — *Emprises*, entreprises.
— 237, v. 32. — *Fineras*, tu useras.
— 240, v. 29. — *Enquerre*, enquérir pour s'enquérir.
— 246, v. 6. — *D'heure*, à temps.
— 246, v. 26. — *Quise*, requise, du verbe querre.
— 247, v. 3. — *Quant et luy*, avec lui.
— 247, v. 7. — *Fétard*, paresseux.
— 247, v. 29. — *Viller*, avilir.
— 248, v. 14. — *En-cherrons*, de encheoir, tomber.
— 252, v. 31. — *Celle*, pour cette.
— 253, v. 28. — *S'aïre*, de se aïrer, se courroucer.

- P. 255, v. 14. — *Éme*, estimation.
- 256, v. 2. — *Aousté*, moissonné.
- 257, v. 12. — *Despoir*, désespoir.
- 258, v. 4. — *S'aucun*, pour si aucun.
- 260, v. 31. — *Voire da voire*, oui-dà, oui.
- 261, v. 8. — *Gogues*, farces, ragoûts.
- 262, v. 32. — *Cil*, celui.
- 268, v. 30. — *Planté*, abondance.
- 272. — Ces strophes furent ajoutées par Guillaume Linocier, dans l'édition de 1619.



PROSPER BLANCHEMAIN





PROSPER BLANCHEMAIN



EN 1878 mourait M. Charles Brunet, laissant inachevée son édition d'Amadis Jamyn; M. Prosper Blanchemain en continuait l'impression, et, dans une notice émue de quelques pages, rendait un pieux hommage à son ami. Pouvait-il prévoir qu'un an plus tard la mort lui ravirait à lui-même l'heur de terminer et de publier son édition des *Mimes* de Baïf?

L'ouvrage était tout entier aux mains de M. Willem, son éditeur et son ami, le premier volume allait être achevé et

M. Blanchemain en corrigeait les dernières épreuves, lorsque, le 25 décembre 1879, la mort vint l'arracher à son œuvre. Tous ceux qui l'ont connu purent, à l'émotion que leur causa cette funèbre nouvelle, comprendre et mesurer l'inconsolable douleur de ceux qu'attachaient à lui les liens du cœur et du sang.

Quelques jours après, je recevais les épreuves du second volume de Baïf. M. Blanchemain, qui m'avait fait le grand honneur de me dédier cette édition des *Mimes*, avait pensé, dans la prévision de sa fin prochaine, que je me chargerais de mener son œuvre à bonne fin. J'acceptai ce legs touchant, et j'éprouvai cette douceur de continuer en quelque sorte, par delà la tombe, avec sa chère âme, un entretien commencé dans la vie.

Après avoir exaucé ce vœu d'un ami, il me reste un devoir à remplir. Je voudrais, dans ces quelques pages destinées à demeurer à jamais jointes à sa dernière œuvre, rendre à l'homme de lettres le juste

hommage qui lui est dû, et dire quelle trace durable il laissera dans la littérature française.

Né à Rouen, le 16 juillet 1816, Jean-Baptiste-Prosper Blanchemain fit ses études au lycée Henri IV, où il fut le condisciple des princes d'Orléans. Reçu licencié en 1838, il entra en qualité de rédacteur au ministère de l'intérieur, où, quelques années plus tard, il remplit les fonctions de bibliothécaire. En 1843 il se maria et devint le gendre de M. Boissel. Riche, heureux et poète, il aspirait déjà à se ménager, dans quelque solitude choisie, un de ces beaux loisirs que remplissent les soins du domaine, les joies de la famille et le culte des lettres. Ce ne fut cependant qu'en 1857 qu'il réalisa son rêve. Il se fixa dans une romantique vallée, sur les bords de la Creuse indolente, et il enferma dans son parc les ruines séculaires du prieuré de Longefont. C'est là qu'il vécut désormais ; c'est là que, béni dans ses affections de père et d'époux, il savoura sans faste les

dons qu'il avait reçus de la fortune ; c'est là qu'heureux et libre, il sut être sage et n'oublia pas les hommes, leur prodiguant chaque année les doctes fruits de ses studieuses lectures ; c'est là enfin que, sans attendre aussitôt la mort, il l'accueillit d'un visage souriant, espérant sans doute qu'elle ne le prendrait pas tout entier.

Ses *Œuvres poétiques*, qui lui valurent plusieurs couronnes académiques et le titre de maître ès Jeux Floraux, se composent de cinq volumes petit in-octavo, publiés chez Aubry, les trois premiers en 1866, sous les titres de *Poèmes et poésies*, de *Foi, Espérance et Charité*, et d'*Idéal* ; les deux derniers en 1875, sous ceux de *Fleurs de France* et de *Sonnets et fantaisies*. Au mois de juillet 1879, six mois avant sa mort, M. Blanchemain put voir avec un légitime orgueil une nouvelle édition de ses poésies, formant deux volumes in-18, sortir des presses de Quantin.

Comme poète, il s'éleva à un idéal un peu vague et légèrement vaporeux. Ses

vers, faciles et abondants, d'une forme élégante et simple, toujours classique, révèlent une foi chrétienne vive et sincère ; ils témoignent de l'inaltérable bonheur qu'il dut à l'unique amour qui remplit sa vie ; ils laissent entrevoir une âme sereine, ouverte au bien et à toutes les joies pures de ce monde. Beau lac, à la surface unie, qui rit sous un soleil de mai, flots sans abîmes et sans tempêtes !

Ses travaux littéraires sont considérables, et nous ne pourrions ici rappeler que les principaux. Bibliophile et homme de goût, il forma à Longefont une précieuse bibliothèque, où il se plut à rassembler les plus belles éditions des poètes de la Renaissance, non pas pour la satisfaction égoïste de posséder seul quelques livres rares ou uniques, mais pour enchanter sa vie du plaisir de leur lecture et pour nous rendre ces poètes dans de nouvelles et correctes éditions. Dans ce commerce intime, entretenu avec ces favoris des dieux et des rois, il s'ingéniait à soulever les

voiles dont ils avaient enveloppé leurs amours, souvent innocentes et feintes ; et il nous révélait ces amoureux secrets dans de piquants articles, qu'en 1876 et 1877 il réunit en deux volumes in-octavo, intitulés : *Poètes et Amoureuses*.

Nous arrivons enfin aux nombreuses éditions que donna M. Blanchemain des poètes du seizième et du dix-septième siècle. Il débuta par Vauquelin des Yvetaux (1854) ; puis, avec les *Œuvres inédites* de Ronsard (1855), il entra dans la voie féconde qu'il devait suivre pendant vingt-cinq ans. Les deux premiers volumes de son édition de Ronsard, sur laquelle nous reviendrons tout à l'heure, parurent en 1857, chez P. Jannet, qui publia le troisième en 1858. Pagnerre édita le tome IV en 1860 ; les tomes V, VI, VII et VIII ne parurent qu'en 1867, chez Franck. Après Ronsard, Prosper Blanchemain publia successivement les œuvres de Fr. de Maynard, en plusieurs volumes (1856, 1864 et 1867), un premier recueil (1868) des *Sa-*

tires de du Lorens (le second est annoncé pour 1880), les œuvres de Tahureau (2 vol., 1868-1869), les *Elégies* de Jean Doublet (1869), les *Foresteries* de Vauquelin de la Fresnaye (1869), le *Plaisir des champs* de Claude Gauchet (1869), les *Poésies* d'Olivier de Magny (4 vol., 1869, 1870 et 1878), les *Rondeaux d'amour* de Jehan Marion (1873), les *Epigrammes* de Gombauld (1873), les œuvres de Louise Labé (1875), les *Satires* de Courval-Sonnet (1877), les *Poésies* d'Antoine Corneille (1877), les *Poésies* de Malherbe (1877), les *Satires* de Robert Angot de l'Esperonnière (1878), les *Œuvres poétiques* de Marie de Romieu (1878), la *Pancharis* de Bonnefons, avec les imitations françaises de Gilles Durant (1878), les *Madrigaux* de la Sablière (1879), les *Œuvres* de Guy de Tours (1879), et enfin les *Poésies* de Jean Passerat, qui doivent paraître prochainement.

Chacune de ces nombreuses publications, toutes issues d'un même goût, d'un

même labeur, constitue un service rendu aux lettres et mérite l'estime de tous ceux qui s'intéressent au développement de la langue et de la poésie françaises. Cependant elles ne renferment ni de profondes études historiques ou critiques, ni de savantes recherches philologiques; et, fussent-elles plus nombreuses encore, elles ne suffiraient peut-être pas à défendre de l'oubli le nom de leur consciencieux et sympathique éditeur. Il faut plus et moins tout à la fois pour mériter, selon l'expression de Malherbe, une de *ces belles feuilles toujours vertes qui gardent les noms de vieillir*. A défaut du génie dont la nature est avare, pour vivre dans la mémoire des hommes, il suffit, mais c'est l'absolue condition d'une renommée durable, il suffit, dis-je, d'une idée juste, conçue et exécutée à son heure : une lueur de vérité devient un rayon de gloire. Or, Prosper Blanchemain eut cette lueur; il eut cette idée juste, qu'il entrevit nettement et qu'il sut réaliser à l'heure marquée où elle devait être

comprise et appréciée, et répondre à une évolution nouvelle du goût littéraire. Son édition de Ronsard est un monument sur le piédestal duquel son nom restera gravé à jamais.

Ronsard, remarque-t-il, dans le court avertissement qui ouvre le volume des *Amours* paru en 1857, « gâta ses ouvrages vers la fin de sa vie... Atteint d'une caducité précoce du corps et de l'esprit, il remania ses ouvrages. Devenu d'une piété méticuleuse, il en retrancha tout ce qui pouvait avoir un peu de cette verdeur de langage que le français cependant tolérait encore... il introduisit partout où il put, à la place de vers simples et naturels, des vers ridiculement ampoulés... » L'éditeur osa donc remonter des dernières éditions aux éditions originales, rétablir partout le texte primitif, restituer les passages retranchés ou mutilés par la main sénile du poète. C'était, on en jugera, une grande hardiesse « que de restituer ainsi le texte modifié ou condamné par Ronsard lui-

même, et de rejeter au second rang ses corrections définitives; c'était violer le testament littéraire du poète. »

Prosper Blanchemain eut cette heureuse audace et la fortune lui sourit. Son édition des Œuvres de Ronsard sera donc pour lui un titre certain à la reconnaissance de la postérité. C'est plus et mieux qu'une restauration. Comme à cet époux de l'Aurore que célèbre la Fable, les dieux n'avaient accordé à Ronsard qu'une immortelle vieillesse : Prosper Blanchemain lui rendit la jeunesse !

L. BECQ DE FOUQUIÈRES.





TABLE



PRÉFACE. VII

LES MIMES

A MONSIEUR DE JOYEUSE.	3
PREMIER LIVRE	II
SECOND LIVRE.	73
TROISIÈME LIVRE	179
QUATRIÈME LIVRE	226
ADDITIONS	272
NOTES	277
NOTICE SUR M. PROSPER BLANCHEMAIN	287



Paris. Imprimerie de Ch. Noblet, 13, rue Cujas.

vol.
A

15

AF 507

LES MIMES

ENSEIGNEMENTS ET PROVERBES

DE J.-A. DE BAÏF

RÉIMPRESSION COMPLÈTE COLLATIONNÉE

SUR LES ÉDITIONS ORIGINALES

AVEC PRÉFACE ET NOTES

Par PROSPER BLANCHEMAIN



III

PARIS

LÉON WILLEM, ÉDITEUR

2, RUE DES POITEVINS, 2

—
1880

CC. d. 24

THE MINDS

OF THE

ANCIENT

AND

MODERN

PHILOSOPHERS

BY

J. G. BURTON

OF

THE

UNIVERSITY OF

OXFORD

PRINTED

BY

J. G. BURTON

